

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
MAY 7 1940

T 3205/3142.82

8

江都縣志卷之十一

試江南揚州府江都縣知縣 陸朝

官編輯

祠祀志

社稷壇在舊口外濠西

考社稷春官大司徒設社稷之壇而樹之田土

為其象 擇惠重民命也晉漢而上社稷天下通

祀明洪武七年始定社稷之祭社祭土稷祭穀立

木主二左為縣社之神右為縣稷之神

先農壇在城南九龍

江都縣志卷之十一

試江南揚州府江都縣知縣臣陸朝璣奉



旨編輯

祠祀志

寺觀附

社稷壇在西門外濠西

考證司禮春官大司徒設社稷之壇而樹之田土

為其禦八捍患重民命也晉漢而上社稷天下通

祀明洪武七年始定社稷之祭社祭土稷祭穀立

木主二左為縣社之神右為縣稷之神

先農壇在城南九龍

國朝雍正四年奉

旨令各

省撫轉行各府州縣衛所於各該地方擇潔淨

地照京城九卿所耕藉田四畝九分之數設立先農壇於雍正五年始每歲仲春亥日府尹督撫及府州縣衛所等所屬之員耆老農夫恭祭先農之神照九卿耕藉之例行九推之禮壇高二尺一寸寬二丈五尺正房三間中奉先農神牌東貯祭器農具西貯藉田租穀廂屋二間東備祭品西住農民南向大門牌坊一座四面繚垣隨壇藉田四畝九分耕牛一隻農具一副每年耕藉祭祀品物羊一豕一帛一鋤一籩豆四簋二簋二又

奉

旨於欽天監頒行曆日之時即檢祀日曉諭天下各府州縣

舉行祀典

風雲雷雨山川壇在南門外舊制壇立木主中為風雲雷雨之神左為境內山川之神右為本縣城隍之神雍正七年禮部議奉

上諭以雲師雷師為國佑民靈應顯然宜特建廟宇崇祀查

前明集禮郡縣立雷雨壇於社稷壇西風雲壇於社稷壇又明會典每歲春秋分後三日合祭雲雨風雷集禮既稱雷雨在西雲在東今雷師廟宇應建

方雲師廟宇應建於方雲師照古制於立夏祔祭師古無專祀酌依明會典合祭之期每歲秋分三日致祭

考證周禮大宗伯以禋燎祀風師雨師漢祀風雨唐加以雷至明加以雲總名之曰山川壇

八蜡廟在西門外明嘉靖二十年通判周鼎建

考證禮記天子大蜡八伊耆氏始為蜡蜡者索也歲十二月合聚萬物而索饗之也註謂八蜡者先嗇一司嗇二農三郵表啜四貓虎五坊六水庸七昆虫八天子之蜡以此八神為主又禮運云仲尼

與於蜡賓是蜡祭通於侯國也

城隍廟在縣治西

考證城隍之名見於易禮記天子大蜡八水庸居七水則隍也庸則城也城隍之祀昉於此至唐始令天下通祀城隍明洪武初封縣城隍伯爵後止稱本縣城隍之神

古城隍廟在何城外

瓜洲城隍廟在鏡泗橋之東明隆慶間鎮人魏浙建

馬神廟大東門外馬監舊有廟明嘉靖四十一年知縣

趙訥重修萬曆間馬神祀不舉今廟一在浦

東一在左衛街

證周禮夏官校人春祭馬祖夏祭先牧秋祭社冬祭馬步馬祖天駟先牧始養馬者馬社始乘馬者馬步神為災害馬者

旗纛廟舊不衛後洪武四年指揮馬某建永樂八年指揮姚凱修正統十二年指揮李鎧重修今圯每歲霜降日遊擊舉祭皆在演武廳

考證周禮大司馬中秋教治兵如振旅之陳辨旗物之用旗之設昉此續文獻通考云明制祭旗纛以每歲仲秋祭山川日遣祭於壇內之旗纛廟霜

降日又祭於教場歲暮享太廟日又祭於承天門外按此則霜降日教場之祭所由來也

厲壇在北門外壽寧街東每歲於清明七月十五日十月朔迎城隍神到壇祭無祀孤魂

考證禮記王為羣姓立七祠有泰厲諸侯為國立五祠有公厲大夫立三祠有族厲春秋傳曰鬼有所歸乃不為厲續文獻通考明洪武已酉特勅郡邑里社各設無祀鬼神壇以三月清明七月十五月初一日祭以城隍神主之

土穀神祀在縣治儀門外又坊亦有土穀祠

忠義祠在縣學內西偏 雍正二年奉

旨特建祀之以忠義著者七年知縣陸朝璣訖工

節孝祠在運司北大街雍正二年奉

旨特建祀邑之以孝著者七年知縣陸朝璣訖工

火星廟在新城徐寧街邑人曾鉞感熒惑入夢捐資與建屢著靈顯各坊亦多有之

考證漢書五行志云古之火正謂火官也掌祭火星行火政

江水祠在瓜洲鎮

考證漢書地理志云在江都縣蓋漢宣帝詔祀江

處郊祀志云昭帝以四時祠江海雒水為天下祈豐年自是五嶽四瀆皆有常禮江於江都皆使者持節侍祠惟泰山與河歲五祠江水四餘皆一禱而三祠焉

江海潮神祠在瓜洲鎮明景泰六年知府王恕修大學士高穀有記成化十九年知府楊成重修時前守王恕為尚書復郵之記之

龍廟在九曲池宋建隆初建陳造有記

錄宋陳造記曰五龍血食於揚肇自國初而昔

皇帝之破李重也駐九曲池上有龍鬪事已乃廟祀之廿反廟殿第繪像於建隆

廟之故基其夫不廟而象之故漫不可考
 年制趙公來制帥聞旱涸告病禱而雨歲以中
 慨念水枯旱暵挽回豐穰非龍孰致之而訪視所
 建庫陋甚人莫起敬惕不敢安乃移為今祠居有
 殿獻存亭夏衣有所為屋各三間別為門而垣之
 掄材而堅良選貢院之餘也擇地而亢爽宅震而
 兌兌澤龍廟則宜也附佛宮主香火以僧欲其
 專也通聞見奔趨畏敬祠祭祈報無或敢怠始
 其經度也或告九良星在焉盍緩之公一夕夢人
 頤而髯顴聳而色瑩黃袍而黑緣捧赤土龍笑授
 公公許即為立祠旦則鳩工庀材不日而崇成迎
 奉之辰晴日麗空遊雲蜚雨滄鬱廟廷公親書廟
 額以揭殿顏是日飛雪薦瑞邦人聳觀其靈異昭
 著如此夫仁民而為聖賢澤物而為龍相異而相
 同相需以濟其所不及天命之也而聖賢又龍所
 依惟五龍顯異於昔朕夢於今效啓聖之符而致
 濟世之功惟公積而德敷而政其信於君孚於民
 者俯仰無愧故有請於龍若桴鼓若景響惟其必
 諸已故能必諸冥漠愴况之表不幸而水若旱惟

無禱也彼且略於已詳於龍吁其難哉公謂某粗
 知文者使之志龍之惠利廟之廢置庸詎永久辭
 不獲遂以公之所示而紀之且述其所以媚於龍
 者詩而碑之其詞曰五龍顯迹肇我藝祖越四壬
 戌郡所依怙顯允趙公建纛茲土乃新廟貌乃大
 祠宇乃以旱請應不移武始焉中熟今茲四輔民
 舒氣和艾晴稼雨盈尺之雪及歲未暮既雪而霽
 望無違者民究所自式歌且舞惠濟如公漢則召
 杜宅生於公古則岐跗惟龍於公如賓斯主祐公
 之民歆社羨嘏公為民請龍弗拒之鑿案刑牲龍
 則茹之鼓桴之應如寄而取如掇而予如交臂語
 民體之意莫龍敢侮禱穰謁歛滌樽潔俎歌歛紛
 若坎坎鼓颺馭靈旗庶其來下燕我
 孫子豐我稷黍庸祇事龍彌亘千古

龍祠在瓜洲鎮八港屯塢百金山謂之金山龍祠

錄

明唐順之重修瓜洲龍祠記曰龍之祠不泯
 於三代之典記禮者謂之四靈蓋以為

之靈者耳其祀於瓜洲禪書朝那龍湫今
 大水之濱無處不祀於宋之儒者論大河

以為不宜祀龍曰走天也之功也龍何力之
 余竊以為未盡也夫天無為而百物之肖
 間者莫不各致其能以效其功而天地未嘗
 之爭功然而百物之功孰非天地之功也至於
 人之制為祠典也凡有功德於天地之間者不問
 細大莫不羣然秩而祀之以致其報而未嘗疑於
 與天地之功然所以報百物之功亦孰非所以
 報天地之功也吾觀於蜡而見古人通乎鬼神之
 情而於於幽明之故矣夫生成百穀以粒民孰非
 天地之功若是則古人為之禮祀以報之可矣至
 於大索鬼神而蜡焉迎猫迎虎而昆蟲亦登焉者
 何也猫虎盡其能於食鼠食豕之間而無遺利龍
 得陰陽五行之氣之精故其變化尤靈猫虎未嘗
 無功於田而謂龍無功於水乎祀猫祀虎未嘗疑
 於與天地分功而獨疑於龍乎然則龍何疑焉而
 不祭於古也曰百物之祭古矣又安知古之不祭
 龍耶古有豢龍氏安知其非如伊耆氏之於蜡實
 掌其祭者耶所謂豢龍者其無乃羞飲食以祀龍
 之謂而好怪者遂以豢龍為畜龍也歟龍乎可畜
 其亦非所以為龍矣古今大水凡四而河與江為

最河移徙潰決不常而江獨為安流意必有宰乎
 其間者而龍之奔走以効其靈也亦不可謂無爪
 洲據江之衝則其建祠以祀龍也亦以祠不知所
 始歲久圯壞嘉靖癸卯奉化王侯杏始為揚州府
 同知署府事乃斥贖金之餘修之而使道士某來
 請記王侯儒者也其為是舉也必有以通乎鬼神
 之情而悉乎幽明之故矣余懼後之人泥於舊說
 而以為非經之祀也為之著論如此使龍其安且
 食於此而無慚焉且使讀
 者其亦無以余為語怪也

龍王廟在通泗門外七里店西北年久廟圯邑人張師

孟因禱雨時靈應重修

盤古廟在城西西與鄉盤古山上山有盤古冢

證大觀圖經云縣西四十里有盤古廟其像

髮席地而坐蓋木俎與初成都太守高暉

禮殿聖賢圖

三皇在府治西明洪武七年改觀音教寺為三皇
後復為寺

夏禹王廟在縣治西浮山之上宋嘉泰間建元至正間
重建明洪武初道士張道弼修嘉靖間知府侯秩知縣
趙訥相繼修

國朝康熙十年邑人閔世璋鼎新之

考證唐書狄仁傑毀吳楚淫祠惟存四祠大禹廟
其一焉

附錄

國朝鄧漢儀浮山禹廟詩淮海揚州地難忘
夏禹功四圍連蜃氣片石鎮蛟宮代改碑亭

肅年深廟貌崇應修裡祀禮不與醮壇同又祠廟
空山好囂塵黠帝容猶然修冕紱曾未種杉松四
壁圖蒼水虛堂吼敗鐘細
看城郭外隱隱送蛟龍

威烈王廟在城北鐵佛寺西具寶祐志今莫考所祀
邗溝廟在城三里邗溝之陽

考證按大觀圖經謂祀邗溝神今土人乃肖像服
衮冕傳其神為吳王夫差謂之財神歲時禱祀亦
里俗鄙之未可信據

董子祠原在兩淮運司堂後司即董子宅內有井曰董
井下志間巡鹽御史朱冠運使畢璽移於新興坊春
仲月屬運司官致祭判官劉以置田十畝辦祭器

五年巡鹽御史戴金同知劉等重修嘉靖二十

巡鹽御史胡植議祭董子祠府縣官並儒學師生俱

陪祀遂為定規仍發贖鍰行運司同知白濬修葺

國朝康熙三十三年運使劉德芳重建四十四年

御書正誼明道四大字額頒懸祠內

附錄 明楊士奇董子祠記曰金華何士英為兩淮

遺井尚存士英考郡志及諸耆舊而信遂葺井而
僚屬致敬四方士大夫過江都知慕先賢者必升
自孟子沒異端之說競起迨秦焚滅經籍盡廢先
王之法而聖學日湮漢興知崇尚孔子諸儒往往
有述而卓然醇正者惟仲舒如論道之大原出於
天強勉問學則知益明強勉行道則德日起與夫

正誼明道之言皆有功於學者論正心以正朝廷
百官萬民四方及有國者不可不知春秋皆有功
於世道君子謂使仲舒得遊聖門無慚游夏仲舒
固孔子之徒也自漢以來孔子之道晦而復彰自
仲舒始仲舒廣川人孝景時為博士武帝即位舉
賢良對策天子悅之以為江都相後相膠西王史
稱其進退容止非禮不行兩相驕王數上諫諍而
正身以率下此豈徒見諸空言者哉洪武中升仲
舒從祀孔子廟庭表先儒以儀來學也則其生之
所居遺跡之所在士英尚賢者其能自己乎詩曰
高山仰止景行行止知尚董子其必心其心而道
其道哉廣川今德州余嘗過之訪仲舒故跡無復
存者顧吏茲土者無可與語而德州之人亦不
復知有仲舒獨江都尚能致敬者由士英也明
喬宇重遷董子祠記曰兩淮運司在揚州府治東
其地乃漢江都王相董仲舒故宅宣德間運司金
華何君士英建祠祀董子正統間四明嚴君正
於廳事之後弘治間新城畢君亨復於運司
建誼書院正德辛未高平畢君璽為運
任之日見司居廳後煬然靡寧以淮揚當

地雖可實會計之則十大夫欲進謁者恒以
 為知惟書院弘敞向明改圖焉乃請於巡
 御史朱君冠以為然於是聿新其規制塑
 像於中為堂者四楹東曰祭器庫宰牲堂西曰匾
 書房致齋所楹之數各如之儀門左右有石碑亭
 巷之南北建棹榭二又買田若干畝以供春秋祭
 祀羨餘則以食守祠者祠之後作書院堂曰資仕
 東西齋曰博聞曰起道以收商竈子弟之俊秀者
 擇明經士為之師以訓迪焉丹堊咸備教條具舉
 誠一時之偉也既落成畢君走書於余求為文以
 志其顛末字惟聖人之道自戰國以來不明於天
 下久矣董子獨能抱遺經於坑焚之後潛心正學
 所以秦漢諸儒鮮有及者觀其論道之大原與義
 利王霸天人三策之對皆有合孔門之大旨先儒
 稱其淵源純粹自學問涵養中來者不信然與董
 子雖不得顯於當時其遺言善行有功於後學者
 蔚乎其未泯也今江都又董子宦履之地御史朱
 君運司畢君乃克崇重而作新之凡章縫之士肄
 業於斯者務相勉焉以進修其實一洗夫薄俗功
 利矯詐之陋庶茲祠之遷有補於風化大矣豈直

潔豆籩美輪奐而已哉畢君所至有政績前知廣
 川時亦嘗葺新董子書院茲修舉國課之餘又能
 稽古考德以儀來學皆不可不書也是為記明
 沈明臣詩落日城隅下蕭條董相門乾坤三策壯
 淮海一祠存不遇當年賦瞻依此日尊庭前數株
 樹烏鵲待黃昏國朝王士徵詩董公祠廟已荒
 涼憑弔西京意倍傷漫以園陵榮王父祇將經術
 奉驕王時逢明主身空老志在春秋道正長我自
 愛傳繁露學玉杯曾問廣川鄉汪懋麟詩秦皇
 昔暴虐焚滅詩與書漢興至文景禮樂猶缺如孝
 武策賢良首舉董仲舒上書陳大道天子嫌其迂
 空令事驕王出相終江都大儒不能用方士何為
 歟青青陵樹斬伐無復餘峩峩董子祠
 俎豆猶不虛我思天人望瞻望增欷歔

孔北海祠祀漢少府孔融相傳縣有融宅及墓雍正元

年六 係揚州知府毓璞重建於南門內

恭愛廟

考證漢廣陵太守陳登嘗於城西二十里濬

塘溉浸田疇歲獲豐稔之利民咸愛而敬焉名

陂曰愛敬陂即今陳公塘是也廟建塘側

附錄宋孫侂重修恭愛廟記曰漢建安中廣陵太

守陳侯登子元龍居郡有異政沈勇內決總

衆多威畧侯所治當東南之臻土俗勁剽物產蕃

夥方是時皇綱弛絕亂臣相與犯上天下紛擾雄

豪並起袁曹虎眎許鄴昭烈拔跡小沛呂布暴桀

下邳桓王經畧江表侯鎮是邦挺然自固武力既

宣疆場不驚法修教浹人趨厥務雅老鰥寡愉愉

嬉嬉侯以休暇行城之西二十里濬源為塘用埽

旱饑有萑有葦龜浮魚游民資以饒溉浸田疇稻

杭豐衍勤本足食廬井恭而愛焉名傳於今以褒

厥廟寅寅虔事四時報饗殆將千載而莫敢忘古

之所謂有功者得其所以濟民則懷悅當時遺後

世無窮之澤此為政者所勸勉也宋興大中祥符

六年始析唐之白沙鎮附以二縣置徽州為江淮

制置發運治所而塘實在其地歲用灌注長河增

淺宣淤滄然流通漕轉弗乏其利彌廣矣於是官

輸民賈物貨粟帛四方使客千艘萬舳雷動而雲

集故於淮之南為州最劇熙寧五年太常少卿陳

留羅道濟極尚書度支郎中河南皮憲臣公弼為

之使慨然追侯之功治愈久而利視祠之不嚴命

蔣忠烈王祠在南門外廣陵驛南祀漢秣陵尉蔣子文

又城南十餘里外亦有蔣王廟

考證蔣子文廣陵人漢末為秣陵尉以擊賊死為

神立廟鍾山代著靈異廣陵其故里也亦立廟祀

之宋紹定三年李全擁衆圍城守帥趙范禱於

屢戰獲捷為新其祠明初有默佑疆場功加

烈武順昭靈嘉祐王嘉靖間海防劉景韶夢

馬經廣衢一偉丈夫從旁挺丈八矛授劉於

上揮之萬眾辟易頃則所乘白馬嘶而騰空乃驚

寤未幾為夸犯海壖劉討平之追憶前夢知有神

助偶謁蔣王祠則曩所夢偉丈夫儼然中堂而所

乘白馬屹然立於門外因再拜堂下惜其棟宇傾

頽乃捐金重葺立碑於廟以記其事俗稱白馬廟

附錄

唐温庭筠蔣侯神歌楚神鐵馬金鳴珂夜動蛟潭生素波商風刮水報西帝廟前古樹蟠

白蛇吳王赤斧砍雲陳畫堂列壁叢霜刃巫娥傳意托悲絲鐸語琅琅理雙鬢湘烟刷翠湘山斜東

方日出飛神雅青雲自有黑龍子潘妃莫結丁香花

關帝廟城內外建廟甚多惟北門街東及三元巷後者最久且著

國朝雍正三年奉

旨令天下郡縣春秋祀帝以太牢又追封其曾祖光昭公祖

裕昌公父成忠公並立木主屆期府祭於三元巷後廟

縣祭於北門廟

考證寶祐志元馮子振在揚州作廟碑起語欲壯

構思久未下筆蘇昌齡時年二十餘代起云大丈夫

夫忠憤不酬於尺寸而廟食磅沛於九州功名一

留於須臾而義烈感慨於千古馮大喜足成

頰書之稱為三絕碑今在三元巷後廟壁間

附錄

元馮子振碑記曰大丈夫忠憤不酬于尸

烈感慨於千古長河之南大江之北陋之而偏州
迂之而僻縣枵然數十之眾輒哀金券地畚土伐
木寧鷄衣百結不敢虛刃獲於雲長之祠祀寧竭
涎一角不敢乏牲酒於雲長之畝宮矧大邦劇邑
人物充斥之鄉千四百赤帝之璽睥睨於一旦徼
倖之奸凶劉表無意於中原劉演殞命於幽朔卯
金刀之胄僅懸其一縷之墜緒於樓桑大耳之衰
宗雲長奮起河東與昭烈遇自爾周旋艱險投間
抵隙之會未嘗不身親其間識者謂誠顏良於白
馬之圍不如破孟德於赤壁之鬪爭曾肅於益陽
之瀨不如降于禁於襄陽之攻勲業垂成貉夏為
厄有志之士蓋深悲之嗚呼昭烈展轉於公孫羈
縻於呂布棲遲於袁紹進無容足之地退無寄跡
之穴四方響應之初乍合乍散乍奔乍衄始不知
其幾矣而雲長不肯輒去去輒復返古所謂主在
與在至亡與亡者耶人間梗梗楸楸之夫後雲長

千數百載所以願為之執鞭不慕王之剪敵萬人
不慕王之雄世百代不慕王能魏土列三分之漢
鼎不慕王能赤手擎一面之荊州其拳拳向雲長
之心者特以其當賊操九州之地已有其七之時
伎窮力殫獨不忍背棄流離顛沛之昭烈爾彼張
翼德亦若是矣英魄凜凜雖死猶生廣陵之城隍
西廡舊構祠嚴祀雲長甚謹予是
以掇王之平生衷素如是併書之

三義閣在新城永盛街東初名關侯廟元時建

國朝康熙四十二年僧深玉重修增祀昭烈帝及桓侯張

飛像因更今額

附錄

明陸弼詩百尺飛樓瞰紫岑千秋遺像鑄黃

浮雲天渺渺轅門細柳晝陰陰終知開濟難
為力偏使元戎易濕襟注閣為孫叅戎募建

孝婦祠

考證陸弼縣志引十道志云揚州有孝婦祠

寰宇記云卽漢于公所祭者按漢書于公祭東海

孝婦而雨舊志所引謂卽揚州孝婦祠未知何考

東陵聖母祠寰宇記云在江都縣南三十里舊志謂在

城東蔡家莊元大德五年重建廟

考證按後漢書郡國志廣陵有東陵亭時有女子

杜姜左道通神縣以爲妖收獄桎梏變形莫知所

極縣以狀上因卽其處爲廟號曰東陵聖母祠又

集僊傳聖母海陵人適杜氏師劉剛學仙術道成

夫不之信告官繫獄頃之聖母已從窓中飛出衆

人望之轉高入雲中於是立廟祀之每著靈驗常

有一青鳥集祀所人有遺失禱之則鳥飛墜盜物

之處以此廣陵道不拾遺據二說不同當以漢書

爲正宋韓琦有祈雨文

附錄宋韓琦揚州祭聖母祠祈雨文曰維慶曆六

年歲次丙戌某月某朔某日具官某謹以清

酌之奠昭告於聖母之靈某聞之於詩曰旱旣太

甚靡神不宗則知古人閔雨之際不愛牲幣凡神

能福於民而爲民之所奉者皆得索而祭焉今歲

夏季以來境內不雨稽人狼顧以田爲憂長民者

亦嘗設壇禱龍欸祠求神齋恪之誠不爲不至近

方靈應有荅而民望未厭是用陳茲薄薦乞靈於

神神其體斯民所奉之心示神能福之意廣敷

陰施惠此一方使時澤霈然年穀大獲則民仰

德不謂無靈尚饗國朝宗觀東陵聖母廟

田漠漠遠黃塘畫壁靈旗帶夕陽七尺鬚眉

魚

步學仙何處遇劉剛

仙女廟在縣東北三十里

考證酉陽雜俎云東陵聖母廟主女道士康紫霞自言少時夢中被人錄於一處言天符攝將軍巡南岳遂環以金甲令騎道從千餘人馬蹀虛南去須臾至岳神拜迎馬前夢中如有處分岳中峰嶺溪谷無不歷也恍惚而返聞雞驚覺自是生鬚數十莖今廟祀卽此仙女也

附錄

國朝李沂經仙女廟詩原草綠萋萋輕舸轉碧溪近江流水急到岸客帆低廟鬼鑄頑石牆花剝舊泥仙蹤不可問惆悵日沉西

神醫廟在府東南太平橋祀漢華佗今名華大王廟

考證三國志佗嘗視廣陵太守陳登病謂胃中有蟲數升將成肉疽作湯飲之果吐出蟲三升許所苦卽愈廟碑云佗沛人以醫神於魏揚之吳普師其學佗沒哀思不已廟之立昉於此又明成化間邑士馬岱以赴省試病夢神治之寤而頓痊其年遂獲雋後歷官貴顯請以家祠勅建今廟

魏文帝廟

考證按一統志曹丕攻孫權黃初六年冬十月詣廣陵大寒水冰舟不得入臨江而還後人爲之立

廟稱曹王廟土人或誤為曹彬云

附錄

國朝郭士璟詩十月南征水互凝駐兵野廟指金陵要知南北長江限不及邗溝一片水

忠貞祠在南門內祀晉尚書令卞壺明嘉靖間因其裔

孫福至日新五世同居大學士夏言奉勅書義門二字

表其祠

考證晉書卞壺傳永嘉中壺東依妻兄徐州刺史

裴盾盾以壺行廣陵相

謝太傅祠在運司南法雲寺後祀晉太傅謝安

考證通鑑晉太元十年會稽王道子專權為姦諂

所構與謝安有隙會秦來求救安乃自請救之出
鎮廣陵築新城而居新城在府城北一十八里非
今新城也

附錄

明施鈞詩晉室將傾不易支先生出處繫安危山間紅袖從游日天下蒼生望起時風暖

甘棠廟在邵伯鎮舊祀晉太傅謝安歲久廟圯鎮民肖

像於五聖祠前殿明嘉靖六年給諫彭汝實改題其額

曰東山書院隆慶元年督學使耿定向謂安宜正位於

堂檄揚州知府遷安像居後殿國子監監丞沈珠為碑

記而五聖未毀

國朝康熙二十三年江蘇巡撫湯斌令毀治內五聖祠乃

改祀三官於前殿仍以後殿祀安

附錄 明沈珠奉遷晉太傅謝公像記畧云一統志揚郡城東北四十五里甘棠廟祀晉太傅謝

公安史述公淮淝捷後熾奸扇搆出鎮廣陵築壘日新城相視步邱地勢西高湖水洩嘗苦旱東漸下湖漲沒農田為築埭以界之民享其利立廟祀之稱曰甘棠蓋比之召公斯鎮與湖皆以名歲久廟壞鎮民戴紀輩飾像置五聖前堂隆慶改元夏五月督學使耿公試士海陵珠追隨及鎮館於廟觀太傅像肅然曰先賢奚置是務正位於堂始稱乃檄揚郡守衛侯侯下之江都尹方侯亟遷後殿遂以公命問記於珠珠考之晉書太傅處大事決大疑當大難成大功咸不動聲色尋常談說措施一一曲中其在官無當時譽去後為人所思邵伯埭僅其一端也禮有功德於民者毋廢祀督學公特為遷定其位夫固治埭人之心而愛戴太傅於無窮也歟

佛狸祠元王暉秋澗集詩注云在瓜洲城

考證 按南史宋文帝紀元嘉二十七年十二月魏

太武帝率大眾至瓜步聲欲渡江二十八年正月

退歸佛狸者魏太武小名也宋辛棄疾詞有佛狸

祠下一片神鴉社鼓之句

附錄 宋陳造詩佛狸歲未卯志欲吞宇縣當年江飲馬腥血浸淮甸無人飯耕牛有井巢歸燕

至今聞遺史為汝空飲恨緬想瓜步留殺氣纏吳分云何此山椒遺像儼高殿無乃甘事讐吳俗昧所見或復綿歷久後嗣忘敵怨冥莫彼有識福汝吾敢信君看趙與薛狗國冒禍釁魏侯繼前躅長呼死白刃胡不尸祝之香火均遠近豈但祈神休抑使頑懦奮誰今決從違引手適我願註趙侯立薛侯慶魏侯勝皆淮南死事將也張蘊詩如此江濤更有人佛狸竟死不能兵幅巾短棹鷗前夢

未省當時有此城 元王暉詩江山照眼舒清眺
千古興亡墮眼前瓜步市長連野戍佛狸祠古慘
荒烟掩樓看取平吳日父老空傳飲馬
年此日不須開濁浪好風都屬往來傳

司徒廟在縣西北善應鄉平山堂西

考證按搜神記五神異姓茅許祝蔣吳也又南史

王琳列傳王琳破侯景有功後與陳將吳明徹戰
敗被執殺之琳故將朱瑒等為書請陳還其首權
葬八公山側瑒等乃北歸別議迎接尋有揚州茅
智勝等五人密送喪柩達于建鄴後人以為即五
神也又相傳五神約為兄弟好畋獵地舊多虎人
罹其害一日山谿旁見一老嫗五人請歸以母事

之及出獵歸失其母五人曰必罹虎害矣奮力捕
之俄有虎伏地若悔罪狀自是虎不為害五人歿
人思其德立廟祀之隋追封司徒加侯爵江都有
廟不知始自何時宋紹定間李全寇揚州禱于神
不吉剖割神像全尋敗走新塘眾殺之解其肢體
人以為神之報也賊平趙范等撤其廟新之奏賜
額曰英顯賈似道鎮揚州復請加王號焉

附錄

國朝王猷定重修五司徒廟記畧曰揚州神

異傳五司徒與蔣子文並傳異甚神茅姓勝
其名與許祝蔣吳四姓結為兄弟忽溪傍見一嫗
遂迎歸以母事之不知其非所自出也饑虎食其
母五人奮力殺之地無虎患州人思德為立廟隋
封司徒侯爵及宋紹定中驅李全磔新塘明世宗

三十有五年護郡民匿彤襜中着鍍金鎧持斧立
橋上島夸顛仆弗即逞尤異者歲旃蒙作噩寇窺
城筮諸神斫牙旗旗折而賊壓焉人以為神世德
于揚也爭修廟社以崇報云宗元鼎詩降監道
不昧感通屬至理諸君試靜坐聽吾言亶亶廣陵
有靈神司徒君茅氏茅君生六朝世亂居於此許
祝與蔣吳共結為兄弟慷慨喜畋獵義氣重閭里
山中老媪賢五人孝如子是時多虎患白日踞於
市一朝畋獵歸家已失其母必為虎所啖奮力捕
山阜入穴盡殺之自是除虎禍土人思其德刺史
立廟祀隋封為司徒侯爵光樽俎迨至宋紹定李
全亂復起卜於神不吉跋扈將廟毀全敗走新塘
眾殺裂肢體叛賊不忠徒明神賜速死能保此疆
界以為宋室有趙范新其廟丹飾煥淮海賜額曰
英顯表其功烈美後復加王號考自寶祐始其廟
在蜀岡至今千年矣正氣肅乾坤威靈降福祉東
城有行宮儀範亦濟濟從來建午月獻牲陳酒醴
四時亦不絕鐘鼓動祝史所貴在寅清豈徒在簠
簋為境除禍災為時順風雨士民遇急難默禱即
為解生平有實驗非僅為虛擬憶昔墮盜舟耽耽

疾相視脫我於危塗終免啞虎尾齋戒謝仁
慈俚詞綜源委聊備史官求敢云大雅比

蕭梁公主祠在瓜洲鎮九坊城上鎮人病目禱之即愈

俗因呼為眼香廟

附錄 國朝魏嘉琬詩六代珠宮闕蕭梁貴主遺芙
蓉入江暈環珮有秋思祠屋新繼在香簾舊

篆吹何勞問張
湛空得眼方奇

二郎廟在東關馬草街

考證按龍城錄云趙昱字仲明與兄晃俱隱青城

山從道士李珣學道隋煬帝知其賢徵不赴命益

州太守强昱至京師縻以上爵不就獨乞為蜀嘉

州守時健為潭中有姥蛟為害蜀江人患之昱莅

任五月使人往青城山渡江溺舟七百艘昱大怒率甲士千人及州屬男子萬人夾江岸攻噪聲震天地昱乃持刀沒水頃江水盡赤石岸半崩吼聲如雷昱左手持蛟首右手持刀奮波而出州人事爲神明隋末隱去不知所終後嘉陵漲溢蜀人思昱頃之見昱青霧中騎白馬從數獵者見於波面揚鞭而過舟人爭呼之遂沒蜀眉山守以聞太宗封神勇大將軍廟祀灌江口昱斬蛟時年二十六歲故以郎稱

隋燕王廟

考證大觀圖經云隋大業十三年煬帝孫燕王倓及於難唐太和二年詔立廟

康令祠康令失其名唐咸通中爲江陽令歲大旱康禱雨赴水死邑人爲立祠祀之

曹王廟在城東五十里大橋鎮西祀宋曹彬廟外有古銀杏樹大可八九人環抱廣蔭數畝

下市廟在廣陵前港見宋劉敬叔異苑

韓忠獻公祠祀宋魏公韓琦琦初以資政殿學士知揚州後又建節淮南揚民爲肖像祀之祠在舊城雍熙院內熙寧中江淮發運使蔣之奇作記

范文正公祠在平山堂東明崇徵間巡按御史范良彥建肖像祀宋參知政事范仲淹以四子純祐純仁純禮純粹為配

國朝康熙十六年重修增祀後裔大學士文程浙閩總督承謨

歐陽文忠公祠宋慶曆中歐陽修知揚州民感其惠為立祠久圯今祀修於平山堂後樓以知揚州蘓軾配

胡安定公祠在西門外蜀岡大明寺右明嘉靖初巡鹽御史雷應龍巡按御史王鼎立祠祀胡瑗至二十一年巡鹽御史胡植知府朱懷幹增祀李衡王居正為三先

生祠繼又增祀李樹敏沈珠為五先生祠

國朝康熙五十九年知縣項維聰重修

聲隅先生祠在揚子橋宋江都令羅適建祀寓賢黃晞

附錄宋蘇頌聲隅先生祠堂記曰聲隅先生祠堂

安黃氏諱晞字景微年少時以有道稱於閩中泉南陳侯靖福唐陳侯絳在郡日爭以禮延請躬率諸生試聽講席於時士人皆尚章句務為奇靡先生獨好古學不與眾合嘗倣論語法言著書十篇其發明聖賢道義之隱微與古今治理之得失詳矣自題其篇為聲隅子欬歔瑣微論其解曰聲隅者枿物以顯志也景祐中先生年四十矣始隨鄉貢至禮部又上五十策求應直言詔科俱以後時不得與試已而歎曰老大不偶若此豈能復從諸少年校程式於塲屋間乎可以逝矣然欲閱天下義理觀未見之書莫若居京師為得計遂僦舍僻處而士子競造其門先生之學無所不通尤潛心

春秋周易其說以左氏凡例爲得聖人之微鄭康成象數極天地之蘊學者校量攻擊終莫能窮奧窔丞相武寧章公以其鄉人召置門下權利所處非所樂也時我先人方在臺省早聞其風下榻以招之先生欣然相就旣一授館凡歷五期頌日與之游切劘論難愈久不窮後十餘年頌復仕朝廷先生獨居陋巷晏如也又著揚庭新論十篇其指陳當世之務有若言禮樂述作之所由則太常卿論足矣言郡國武備之廢置則九州刺史論足矣餘篇悉然蓋欲見於行事者也方是時公卿大夫交章論薦者數十人朝廷用丞相韓魏公言將以爲國子監直講先生自謝於富丞相曰老生豈任仕宦者耶必不可辭願得七品閒官還南方足矣仁宗皇帝聞而異之特詔授太學助教致仕從其志也嘉祐二年四月無疾卒於隆和坊儼舍死之日囊無餘貲惟蓄書數萬卷存焉一子在遠不及治命門人范遷張粵議以頌爲知先生之深者宜主其後走僕來告頌卽日往哭其尸爲買棺就殮且謀寄骨郊寺翌日魏公遣使爲幹殯且又奠之以文其略曰先生之道德不用於朝宰相之過也

聞者莫不痛先生之有時無命而推魏公之推賢抑已也未幾其子自南方來挈旅櫬載遺書以去過江都藁攢於揚子寺後圃旣而交遊故人共爲復土就塋其地其未塋也川陸之經由者識與不識皆過其下咨嗟留連或爲歌詩哀辭或書名屋壁至於木膚竹籊題記殆遍其無位而得民至誠而感物近世未有也羅君莅邑之始首來奠謁因覽馬鬣黯然悽愴且謂大儒不祀後世何觀昔汝南先賢列城圖其像有吳君子仲尼表其墓思人尚德由古而然於是卽其故墟規度餘地增土於上者幾仞構其旁者幾椽設像中楹儼乎惟肖材力之費悉出俸泉不勞於人幾日而就兆域有表松檟有序所以示來者蓋有激於風誼落之日遠近來觀且欲記其經始之由載始卒之行刻諸金石託文舊交予惟先生之道生不得亟行於時死而有名卿巨公周恤其後事歲月久矣餘芳邈焉又有賢令宰爲之封植幽壤表章令名後來之人有踐斯地登斯堂挹先生之遺風知大雅之不改雖綿襪浸遠棟宇其頽又將繼而新之廟食茲邦垂範來裔孰謂先生無後乎

彭守祠在城內祀宋熙寧間知揚州彭思永

羅令祠在邵伯埭祀宋縣令羅適

附錄

宋秦觀羅君生祠記曰羅君之為江都以誠心為主耻言鈞距惠文之事凡民有訟曲直徑決於前不以屬吏誑誤若小過輒誨諭遣去視鰥寡孤獨之有失其所者如已致焉黎明視事入夜猶不已或譏其大勞君曰與其委成於吏民有不盡之情孰若勞已之耳目哉居數月政化大行民知其長者不忍欺給之訟者益少君乃出行諸郊所過召其耆老問以疾苦及所願欲而不得者為罷行之始復大石湖改名元豐廣袤數百步溉田千有餘頃是歲大穰畝收皆倍於是遠近自陳願復陂塘溝渠之利者相屬君一切聽許親至其地與之經始築大隄以邵潮之患疏潦水而注諸江凡水利之興復者五十有五溉田六千頃而桑之野以顛種者亦八十五萬有奇徒其治於東南爽塏之地為屋數百楹以其贏材新驛堠亭館之境者又頗出私錢營致藥劑以給疾病之民所瘡

至不可勝計歲或乾溢有禱羣祠雨暘輒應如響世益謂神其享之歲滿代去其民思之不置乃聚而謀曰我民之德羅君至矣顧無以自效聞古有召伯者善治民民追思之至不忍伐其所憇之棠又有謝公者亦其流也嘗於斯城北築埭後人因名其埭曰召埭今埭實在江都之北境蓋即其地請畫羅君之像而祠之以慰吾民且曰使羅君之名與召謝共傳而不朽不亦可乎眾曰善於是即召伯之東法華佛寺置生祠焉羅君名適字正之台州寧海人學術有本未通於世務風節凜然國士也嘗再被召見皆以不合罷歸其莅官行已所可書者甚多書在江都者以為生祠記云

露筋祠在邵伯鎮北三十里官河西岸事見列女傳祠

基窪下枕湖而河每逢秋漲常被衝塌以故屢建屢圯

國朝康熙三十六年知府傅澤弘感夢重修四十六年

聖駕南巡

御書賜節媛芳躅四大字額兩淮運使李斯佺令商人重建

考證按宋米芾露筋廟碑記所謂澤國之女嚙膚

露筋不就有幃之子者是也唐人酉陽雜俎云江

淮間有驛俗呼露筋嘗有人醉止其處夜為白鳥

蛄所啜筋露而死又江德藻北道記云自邵伯埭

三十六里至鹿筋梁此處足白鳥故老云有鹿過

此一夕為蚊所食至曉見筋因以為名諸說錯見

要當以米碑為正然前人皆莫考其姓氏獨明徐

渭蕭荷花祠詩自註即俗稱露筋娘娘也

附錄

宋米芾露筋廟碑云天地之間雖大體陽况君子陰比小人而五行交相為功各有正位

其麗雜者亦交處於陰陽之間蓋亂臣賊子之所稟婦人女子之所羞雖其粉飾一時班域聖賢明未即察而陰譴亦不旋踵則澤國之女嚙膚露筋不就有幃之子氏不顯於一時祠方揭於千古庸夫庸婦之所傳稱有如昨日是幽顯之所共信而古今不可得而議者然則伯夷叔齊之節不必俟聖人萬世所自知明矣紹聖元年十月岳外史米芾東歸過其下刻石贊曰王化煥猗盛江漢叔運煽猗人倫亂一德產猗昭世典情莫轉猗天質善楚澤緬猗雲木偃煒斯囿猗日星建元貢師泰詩飛蚊撒天連白草落日荒原泣姑嫂嫂留旁舍姑獨行花顏夜委長淮道亂聲鼓翅腹正饑利觜嚙膚血方飽妾行豈不念辛苦死重如山生似羽欲識當年一寸心廟前老樹啼春雨明王翊詩野岸分流截海垠按歌誰復賽波神孤舟夜向祠前泊商女挑燈說露筋王夔詩淮城小如益僻在湖草邊蕭條城下路昔有兩嬋娟秋姿艷明月相携良可憐小姑泣向嫂薄暮慘墟烟炎天值暑溽一望白水田穉稭雜稂莠遠與蒲荷連落日帶沙岸滿耳雷闐闐徬徨自相弔所惜在青年依

稀雙影長顧見返照前修途行旅盡惆悵不能還
夏蚊喧且起著面劇霜鷓囊空無帷帳奈此萬嘴
穿前村有鷄犬燈火見歸船茅茨出叢薄隱約四
五椽匪無有帷子叩門聊息肩嫂云得相依小姑
淚濺濺冰肌與玉體忍委一夕眠風生翠木下兀
兀坐為禪嗜膚攢利鏃洒血亂幽泉平生弱女子
苦當雞肋拳肉盡志終定柔筋露蛇蜒森然出天
巧工豈人力鐫含笑化為鬼攝衣上雲軒素娥共
蟾窟錯落諸星躔天孫下機處一時成俗緣何如
作正鬼心不愧青天終為斃社珠與月鬪春妍干
年露筋廟野水流涓涓崇祠闖水裔珠絲縈几筵
明粧儼如昨彷彿步湖蓮神柳剝將枯獨有心中
堅垂柳自婀娜不受惡藤纏年年臘雪後葉綻翠
眉鮮鄉人粉榆社日有牛羊牽唯聞絳繒紙傘
撒金錢神往女巫下妙舞特踴躍車旗颯靈雨簫
鼓咽秋蟬祇愁神返駕不得此周旋焄蒿古時魂
猶記草中鈿歸來不見嫂遠道正綿綿嫂面有糞
土長淮終不渝分明小姑面留與後人傳米生性
好古書字無半干至今麗牲石苔蘚澁蝸涎碑言
天地間陰陽互推遷陽類况君子小人陰類偏五

行有正位變化歲功全云胡值彫雜交處薦成愆
亂賊所稟性狐媚最便嫁潛如蟻與虱動乃百足
蚊奄忽為魍魎鬼箭脫神弦赤手賣天下性命徒
少延揚揚服袞黼班域在聖賢婦女尚知報奈何
欺入埏明雖未即察陰譴固昭然唯餘澤國女白
骨寄荒阡姓名何必顯有此大義懸清風起懦夫
未讓夷齊專我觀碑上字滿紙秋淪漣共姜賦栢
舟名芳刪後編春秋偉宋姬身與火蛾煎後來有
此碑砧石當犇川隔江望高郵野水惟雎鳶憂來
忽盈抱寫此露筋篇徐渭詩烏鳥既能傷義士
蚊蚋何苦碎貞肌由來天道本無定誰使昆蟲必
有知畫壁幾殘春社雨靈風時滿夜歸旗烟波一
望三千里長在湘江洛水湄又蕭荷花祠詩荷
花一夕凋萬里秋無色獨遺花烈芳千秋襲波澤
揚舲遡大湖風緊日已夕水鳥習舊棲戢羽莛菰
白弔古解維舟去岸不盈尺秉燭褰繡帷金翹儼
宮額燭滅颯然中神爽凜孤魄念此芒叻微奚啻
雄虺索豈無冶容膏冰肌以為臠念茲不能忘惆
悵至明發陸弼詩古廟無名氏蕭條湖水濱露
筋空往事雪涕自行山人山霧羅巾薄庭花玉貌新

南宮詞不愧獨與表貞珉 國朝王士徵詩放舟
湖上水艤檝女郎祠往蹟行人說清風古牒垂畫
衣生積蘚荒徑颯靈旗叢竹香蘋路依稀近九疑
又過露筋祠詩翠羽明璫共儼然湖雲祠樹碧於
烟行人繫纜月初墮門外野風開白蓮 汪耀麟
詩祠水含烟野樹青年白浪打浮萍鶯啼疑是
黃陵廟門外湖光似洞庭 汪懋麟詩貞女無名
姓荒祠獨古今烏啼黃竹短門對碧湖深生死千
秋節淒涼一夜心時聞明月夜環珮出空林 孫
枝蔚詩花貌丹青古靈旗風雨多黃昏仍獨自白
鳥近如何巫曲迎神罷官船打鼓過廟門對湖水
香氣但聞荷又露筋廟神絃曲巫鼓蓼蓼花滿裙
亂斟清酒澆熱雲神女騎鸞獨自來肌肉已盡骨
皚皚旋風呼雷細蟲僵玉鏡化為湖水光鬼嫂索
食啼廟門大兄小姑色不溫夜深神欲上天去人
間污穢難久住 王式丹詩噫吁嘻我不知烈女
何代人傳到于今幾千春亦不知烈女何名復何
姓唯有露筋二字傳其真其初傳之田夫野老口
後來學士大夫詩歌贊頌萬口如一脣憶昔嫂與
姑中夜走荒塗秋蚊密如霧利啄嗜柔膚嫂投田

舍豈必不自保姑縱隨之豈肯為人污而乃皎皎
中天日湛湛一泓水决不令微塵點翳畧近清白
軀當時但取自潔淨豈其有意為名乎無意為名
名所趨萬古歌頌如此女者真絕無作歌自誰氏
歐公倡其始海嶽實繼之後起騰萬紙前明張珩
一闕最奇崛我朝新城王公風雅真罕比其餘
作者妍媸雖各殊大抵表貞揚烈皆可訓俗礪廉
耻紅祠何峩峩乃在湖之涘接檐敞飛薨闕院夾
重肥明之嘉靖年中所修葺百五十載以來日傾
侈甕湖直瀉萬頃波漭沆四圍齧其趾幾叢瓦礫
散蓬蒿幾度昏鴉噪秋水異哉烈女有神靈靈旗
夜下廣陵城髮髻冠帔儼天仙青鸞白鳳相逢迎
廣陵太守夢中見親承嘉命鳩工程一修不已又
增修煥然復舊觀崢嶸歷代標題盡洗刷一丹
黜陳兩楹磨礱大石鐫古篆賢哉太守留其名我
來瞻遺跡俛仰三歎息肅拜具衣冠冰霜照顏色
肸鬻侂佛宮有血幽通真宰關神力似此流芳萬
千億上帝當加褒朝廷當賜勅何但區區一郡士
女所矜式噫吁嘻湖水無時涸河堤日脆薄廟堂
憂民憂南顧誰付託烈女之神貫天經亘地絡既

能示夢新厥宇豈不能請命上帝障此波臣虐朝
 廷歲費百萬金錢填此無窮谿與壑何不刑牲沉
 玉祈神庥一如天妃元君配位泰山與海若噫吁
 嘻我本災餘民忽發狂言賣明神神聽吾言不吾
 喧四拜既畢出廟門茫茫湖水天黃昏孤舟一葉
 纜墻根春來猶見舊潮痕 王士禛菩薩蠻詞女
 郎遺蹟秦郵路晚涼門外青楓樹石竹響空祠蕭
 蕭三兩枝 可憐嗚咽水斜日西風裏那更感人
 情估船
 吹笛聲

繡女祠在縣西北隅內有博柳樹一株相傳宋高宗南
 渡遺宮女於揚修道委蛻多顯靈異居民立祠祀之明
 改爲東岳廟

三將軍廟祀宋將元怡梁宏張昭

考證宋紹興三十年左將軍元怡與前將軍梁宏

右將軍張昭同禦金兵於儀徵怡獨刃六七人力
 窮陷陣死之宏截胥浦橋拒戰斷左臂仍以右手
 挾敵同赴水死昭戰屢勝中流矢而斃州人共立
 廟祀之舊府志云廟一在揚州府城西

旌忠廟祀宋死節臣魏俊王方明太祖嘗夢俊方助國
 詔立廟府城命有司歲時祀之今廟在三元巷後關帝
 廟側

附錄

國朝朱彝尊重修江都縣旌忠廟碑曰旌忠

廟建自宋隆興二年以祀左軍統制魏侯俊
 後軍統制王侯方兩侯均死於戰者也紹興三十
 一年金燭王渝盟括三十二總管之師合蕃漢步
 騎二十七萬自將以南餘艘艘舳舻分據津隘直趨
 維揚宋之猛將爲張浚秦檜誅鉏始盡恃以扞牧

圍僅存病篤之劉錡爾乃用金字牌徹之甘以半
 壁天下九百萬金錢委之葉義問一懦夫奪錡招
 討印綬之李橫此諸軍解體而不敢言者當其時
 王權既敗韓林楊抗龔壽陸廉崔邦弼趙不侮先
 後棄城遁兩侯非不知主客之兵難以相當顧目
 擊大帥輒懦措置失宜措沙為溝圍以鹿角潮回
 漂去一時傳為笑端勢且日蹙寧奮一戰以拙速
 勝持久之兵斯亦前事之所有志未遂並喪其元
 蓋首雖離心不懲也幸而采石之捷事定策功贈
 魏侯中衛大夫邕州觀察使王侯拱衛大夫蘄州
 防禦使立廟故里祀之一堂繪部曲於廡左右記
 所云以死勤事則祀之者歟相傳神嘗感夢於明
 孝陵故載諸祀典歲以三月三日致祭歷年久遠
 廟圯不治今通政司使巡視兩淮鹽課監察御史
 曹公謁廟下語守者曰斯境內之神吾民祈報於
 是旌忠故典修舉不可緩也迺稽謀於眾攻金攻
 木給以餼廩取陳丹暗粉以新之屬其友秀水朱
 燊尊考兩侯之遺事撰碑文勒諸石兼作歌以侑
 神焉辭曰迎神兮丹衢新廟兮故都維暮之春兮
 月出之初神之樹兮庭隅靈風拂兮舒舒將朋酒

兮兩踰神來格兮樂胥覲前兮巫後折山花兮盈
 手紛傳芭兮翔走神之留兮不留縛車船於廟口
 送神兮柳林王侯毅魄兮載浮載沉送神兮湖中
 魏侯死所兮無怨無恫小朝廷兮不武國無人兮
 禦侮持弱荷兮作柱客為狸兮主鼠罷揮戈兮鼓
 弩第鳴金兮息鼓左軍後軍兮戰獨塵千夫一志
 兮不可撓誕先登兮伐橐為國殤兮亦足以豪生
 不封侯兮死當廟食稽故典於祠官兮享祀不忒

三忠祠在瓜洲鎮嵩山寺內明嘉靖間知縣劉良卿建

祀宋左軍統制魏俊後軍統制王方副將趙淮

鄭忠肅祠祀宋淳熙間太守鄭興裔

崔守祠祀宋崔與之與之以直寶謨閣權發運揚州主

管淮東安撫司事防禦金兵使不深入州人德之為立

祠

江都縣志 卷十一 三
畢招撫祠宋開禧間揚民以州守畢再遇戰禦金兵有功祠於夾城

紀忠廟在舊城雍熙院西祀宋紹定淳祐間淮西北戰死之士凡四千五百二十六人

顯勇廟在城南祀宋死節臣吳從龍

考證宋史吳從龍字子雲官至武功郎建康府統制紹定間禦李全兵爲先鋒援不至被擒使至秦州城下誘降終不屈死之廟祀揚秦二州賜額褒

忠

三趙公祠祀宋江淮制置使趙善湘淮南安撫使趙范

淮東提刑使趙葵

邱公祠邱岳於宋端平間先知徽州有禦敵功理宗書忠實二字賜之後復守揚州州人立祠祀焉

雙忠祠宋李庭芝淳祐初權知揚州繼復自陝州移守廣陵姜才通州副都統庭芝與才數拒元兵後城陷被執俱死之州人立祠廣儲門外梅花嶺左石坊至今尙存

大忠祠在南門內新橋坊祀宋李庭芝姜才陸秀夫汪立信吳從龍趙淮並梁祖皓明茅誦崇剛朱哀晏銳邱陞共十二人

文丞相祠縣城西有三義廟舊附祀宋文丞相天祥於
 中明正德十年巡鹽御史劉澄甫以寄寓他祠非所以
 表崇忠義乃與運使張偉太守孫祿卜地城南四里朔
 祠專祀而自爲之記嘉靖五年巡鹽御史戴金重修萬
 曆二十四年巡鹽御史楊光訓復檄府縣修之

國朝康熙五十九年知縣項維聰重修

附錄

明劉澄甫揚州文丞相祠堂記曰文山忠孝節誼今古罔有弗知天下俎豆禮亦宜之當

其奉使伯顏被留軍中與其客杜滄十二人夜自
 鎮江潛逸徽州通書二路制置圖惟厥功苗再成
 給以出城李庭芝備而不納走伏藜篠乞食樵羹
 斯時也先生心跡危疑孤險雖宋世忠臣且猶弗
 信他尚何言哉顧冒山海之艱招疲散之卒仗義
 勤王捐生滅家卒之國亡身繫拘囚三年竟從容

南向以死中原志士仁人至今悲傷不休正德九
 年余監兩淮鹽政往來維揚徽州間考尋遺跡父
 老謂鄉人久立祠於城西便欲瞻謁弗果仲冬徐
 駕部晉過余言乃詳又附祭三義廟內余惻然弗
 安累日鄉士大夫皆盡嘆息欲改構祠屋更飾丹
 青崇乃祀典勵乃風化翼日守揚孫叅政祿持狀
 謁余曰文山先生祠僻寓他祠棟宇湫庫林莽翳
 蕪神惟不享爲守者懼敢請於執事乃謀及張運
 使偉偕與縱觀於城之南厥土惟阜三山遠臨巨
 津迴抱神之來止福並萃止其若工費調度悉偉
 處分且無損儲無動衆余特屬諸運同高選材掄
 其堅工徵其巧經始之旦士民商賈乃罔不悅今
 年四月十有三日丕作五月廿日克成外門隙地
 方鑿一池宛通河水繚以塼垣七十餘丈中堂燕
 室各表三舍左右廡庫皆稱工力弗逮者又捐公
 移積貲及鹽賈一二量願助之深拒弗納者衆也
 乃審厥像塑惟舊繪盛以冠冕表以封號嗚呼忠
 誼之心人皆有之百千萬年固有聞先生之風而
 振起者祠之興廢夫何足恃陳第維揚謁文信
 公祠詩萬死艱難地千秋伏臘新山河終破國天

地已成仁江橋南中像巖松雪後春徘徊歌正氣
不覺淚沾巾 國朝程文正詩一片趙家土孤臣
脫死時未成浮海計猶記指南詩壞壁穿枯
竹陰廊叫子規夜深聽畫馬應背北風嘶

三烈女祠在瓜洲鎮明嘉靖六年巡按御史王鼎江都
縣知縣劉良卿以嵩山寺隙地建祠祀宋烈婦趙淮妾
明烈女殷氏周氏

考證宋史列女傳趙淮妾長沙人逸其姓名德祐
中從淮戍銀樹壩淮兵敗俱執至瓜洲元帥阿朮
使淮招庭芝淮陽諾至城下乃呼曰李庭芝男子
死耳毋降也元帥怒殺之棄屍江濱妾俘一軍校
帳中乃解衣中金遺其左右且告之曰妾夙事趙

運使今其死不葬妾誠不能忘情願因公言使掩
埋之當終身事相公無憾矣軍校憐其言使數兵
同之江上妾聚薪焚淮骨置瓦缶中自抱持操小
舟至急流仰天慟哭躍水而死明嘉靖惟揚志殷
氏年十八周氏年十七俱瓜洲人建文末燕兵從
瓜洲渡江掠得二人欲污之不肯辱並赴水死永
樂間進士黃養正作詩弔之有駢首雙沈玉同心
百鍊金之句故立三烈祠並祀之

金龍四大王廟一在縣東北黃金壩運河岸側康熙元
年運同楊士烜建邑人陳卓有碑記一在南門外文峰

塔灣

考證明陳繼儒傳畧神姓謝諱緒錢塘安溪人宋謝太后戚晚也折節就學絕意仕進建望雲亭於祖塋之金龍山德祐二年宋亡投茗水死元末鄉人皆夢緒為神明太祖取臨安見神金甲橫槊空中助戰其後擁護漕河屢著靈異天啟四年蘇茂相督漕水涸舟不前神降言為我請封當以水報蘇具疏甫畢洪波湯湯萬檣飛渡得旨加封護國濟運金龍四大王

楊家廟在府治西元楊敬仕揚州府丞卒葬城西其子

孫留家於此因立家廟

陳總管廟元陳允忠為總管死於江明嘉靖間倭警顯

異土人立廟於姚家沙大岸祀之

蔣公祠在南門月城內祀明知府蔣瑤

考證維揚志云明武宗南巡瑤不畏權豪民賴以

安堵故立祠祀之邑侍郎葉相有蔣公遺愛祠記

附錄明葉相記曰嘉靖戊戌春揚州太守蔣公遺

愛祠成公昔守揚再踰年陞轉去德在民民懷弗已乃作是祠夫守繫千里休戚一郡之民賴焉揚為郡俗靡民勞守賢功易以集而譽流不賢

易虐民有憂正德間公以名御史出守荆移官於揚初至歲饑即請漕米萬石用活民囂訟公諭遣

之不務深文株逮曰母滋為其困苦衙子弟欲取堂幅紙為文公曰母以此為吏入之漸出數錢別

市紙以供之及聞大駕將南諸路斂攻山峙公一切簡省曰臨時利害瑤請以身當之諸僚更欲盡賦民免徵之糧以供案成公裂之曰民胡可欺比至扈蹕諸悍弁權璫百需公不聽當道欲斂夫直饋公亦不聽怒繫公於舍公憤卧欲絕竟不聽璫欲刷民室女公曰惟瑤有女但遠不可必得若揚女不可刷璫欲奪民舍以拓官店公曰民安居不可奪及諸求胥罔有得恨繫公於舟不飲食者三日復驅公扈舟以行公至徐乘一驢抵臨清乃返一郡卒賴以全及官轉夫婦覓一輕舸載原攜至二衣裳便行嗟乎揚大郡守胡求弗得公至幅紙不私一夫不斂比及雷震山壓之秋而死生利害又一切為民以身當之而不悔傳稱古循良固多其能治行養民若公真誠純德出於天而愛我民痛心切膏如赤子者幾人昔我揚昭陽恭愛常有廟謝韓范歐亦常有祠然諸賢時可為而處其易公則逢事變而當其難禮能捍禦大災患祀有奇節完德在人祀公實兼而有之祠以百世孰不可祠在郡城南大道之旁堂楹門楔宏麗而肖公之像於中我民日往來不知其幾過必式式必拜拜

則頌而思休有光矣然凡我在位亦出入所必經旦暮所共見不有意於思齊乎思公為人而考其履思公行政而效其施加之民而民被其福是亦公爾矣安知民異日之愛我不猶今日之愛公乎若乃見而不知賢賢而不知效法顧自棄則公之罪人也有餘惡哉公名瑤字粹卿歸安人今官太子少保工部尚書朝野方倚重若買地購材鳩工倡眾以成是祠者義官鄉耆諸姓名具列碑之陰相既為記其事復作詩遺我人俾歌以永思其詞曰於休公仁曰甫曰申天錫厥德惠我揚民揚為要區物瘵民痛誰其父母薄寬我誅惟公之治廉公盡瘁哀我顛連綏我髦稚恩勤劬化黠旋逋弗私片紙弗斂一夫漕米萬石我民胥活賦有特蠲野無疲役大駕南來力竭天回孰刷我女孰括我財我民奠居胡奪我廬三日弗食我繫聿蘇蹇驢遑遑臣節惟良我民期怙曷云能忘有新厥祠有穹厥碑秩秩嚴嚴報祀孔宜祠當輳屢尚啟後賢我揚蒙福歲歲年年公壽罔齊公譽弗替陵谷可移公祠百世

唐公祠在南門外官河岸祀明巡撫都御史唐順之嘉靖間順之提援師禦倭患又嘗條畫存活饑民後卒於泰州郡人思慕不忘請建祠祀之

雙忠祠在通濟門外官河南岸明嘉靖三十六年建祀同知朱哀衛經歷晏銳

考證明嘉靖三十五年五月倭犯揚州府同知朱哀與高郵衛經歷晏銳率千戶賈勇及子恩引兵出城渡河東禦之與倭戰哀銳俱死

晏公廟在小東門內粉粧巷口祀死倭難晏銳又東關官河岸亦有晏公廟明成化間建乃水神也與此異

曾襄愍公祠一在廣儲門外一在舊城三元巷曾家垣

祀明嘉靖間總制三邊贈兵部尚書曾銑事詳列傳

李公祠在南門外官河岸明嘉靖間都御史李遂督淮

揚軍務出奇算平倭揚人德之立祠以祀通州侍郎陳

堯有李襄敏公祠記

附錄

明陳堯李襄敏公祠堂碑記畧云揚州舊無

靖時倭竄毒擾東南袁延淮揚諸郡朝議以揚州為南北襟喉要地特設開府重臣督治之於是世宗皇帝用廷臣薦以旌節起公於家授璽書提督軍務兼巡撫鳳陽等處公聞命星馳至鎮賊船不敢迫近明年糾眾數萬入寇公帥諸將登壇誓師一擬死報國恩躍馬先驅為將士倡殲之丁堰殲之西亭殲之馬邏廟灣七星港賊又至殲之仲莊殲之鍋團殲之劉家莊白駒場盡殲之唐家溧前

後公奏捷斬賊首四千七百四十九級燔溺死者無算江南北晏然淮揚父老為建祠俎豆之言言翼翼相望四千里間不絕

深仁祠在瓊花觀內西隅祀明嘉靖間知府吳桂芳石茂華巡按御史吳伯朋巡鹽御史崔棟

范公祠在南門外官河東祀明嘉靖間兩淮運使范總有惠政陞任時商民立祠肖像其中邑侍郎葉相為之記後人並祀宋名臣叅知政事仲淹尚書右僕射純仁徽猷閣待制純粹及

國朝名臣大學士文程浙閩總督承謨

附錄 明葉相兩淮都轉運使范公祠記曰嘉靖庚子徂夏兩淮都轉運范公祠成蓋兩淮之人

思公之德之政共立以祀公也公於嘉靖癸巳以河南守轉運兩淮緣兩淮財賦繁殷事體重大十倍他司當宁最公治行選擇任公涖政之初適鹽法弊壞公私莫為利公即以治家事治之殫畢心力顧鹽雖一節然邊儲國計中間利病蝟興公日夜講求蹟隱入秋毫有老於商不及知而公洞察無留遯沿海之地頻年災丁竈困踣公撫摩若嬰孺賑集轉徙派分逋負寬免重役草澤忻忻若再生諸商多四方右姓挾厚貲佐邊官司不察往往威辱上下情遂扞格每折閱棄其業去惟公凡有呼召必使羣議於庭開誠布公若家人然疴癢疾痛必為之處自是諸商入則子趨出則父戴近年徵收掣美實帑固法之宜但上之取既十倍於前而期限復逼迫若風火鞭笞鎖逮愁苦公力為寬假每使徐貫魚以輸舊一切供億仰責店主商罰無紀極公盡革之不得已而得百分一耳曰民膏我帑我敢魚肉三十場鹽僚屬吏因遠僻多貨公處之若和而約之實嚴略不假借眾始或懟終則賴以自全感且喜凡南北經往賓旅交際旁午公惟待之書冊果茗不以幣伏臘僚友宴集惟魚肉

脯醢無兼品公堂解舍地甚則因其舊少葺不堪
曰我姑待其豐公本儒素人以為官既久或統綺
徐察其私麤衣糲食宴如也惟遇興革一政必盡
夜咨訪惟精惟允明日入以告於上官曰若何為
利若何為不利上官諾而行之種種皆美政人不
知自公出也間有意見或殊人情猶未協必累執
以告雖忤弗恤通泰一帶河流淤舟不可運需費
無算公勸商督竈疏決盡通豈惟利商民多賴焉
若商竈有訟則立召於庭數言得其情去久之民
間大訟大獄多就公質成踰三年政大洽上下胥
利人頌之曰鹽政奚廢公未逢鹽政奚與逢我公
又曰范來早我人飽范來遲我人饑丙申轉陞參
政蜀藩啓行日遮送者空里巷有泣者擁者有念
公官貧懷金走三五十里百里遺公者盡卻之絲
髮無所取眾嘆惋回皆曰我何以報公德繫吾人
永思乃告於諸上司擇城南廡原合謀併力以作
是祠肖公之像於中香燈炯爛不絕堂寢嗟嗟門
庶翼翼高楔重垣峻且華而枕流過者胥式
乃語相曰大夫食於家久見我公之政真又曰大
夫平時絕無私交於我公其好惡必當又曰大夫

每慎許可言必信幸為我記相歎曰夫禮有功德
於人祠公功炳而德茂祠之也宜昔石慶生祠於
齊樂布生祠於燕羊祜於襄張詠於蜀凡以報功
德而釋思也相竊觀公為人性本嚴而敷政則寬
守本介而待人則恕本欲為國豐財而反薄其取
本欲為官最課而反緩其徵何也蓋寬與恕正孔
子所謂居上以寬乃得人之本薄取緩徵則百姓
足君孰與不足之意也賢哉吾嘗歷考兩淮後先
居是任而善於職者不過數人前有耿公九疇繼
有畢公亨復有李公銳皆賢人也耿以廉克畢以
敏克李以嚴克公實足以繼其美而感人之深則
過之祠之百世宜也相得為記公之德之政之大
且要者若此以告我人不知自是聞公之風而興
起者幾人可以同公俎豆是祠當虛以俟若乃見
其善而不知其好好而不思與之齊仍尋常黷取
以厲人亦或旋逐而自棄傷國之體債官之常則
公之罪人也而哉是役也首其事者商者并諸協
力以佐亦秉彛好德之公非以取悅於公也其姓
名及供祀事土田廣袤備書碑之陰可攷公名總
字平甫潘陽人正德丁丑科進士今歷臺省日躋

華要云

王公祠在廣儲門外祀明萬曆間巡鹽御史王明及兩淮運同裴述祖

虞公祠在南門月城內祀明萬曆間揚州知府虞德睦

陳公祠在南門內大街東祀明萬曆間江都知縣陳邦

科見列傳

雙忠祠在西門內四望亭明天啓元年建祀高邦佐陳

輔堯各有傳

郝公祠在城西法海寺側明崇徵間勅建祀死事房縣

知縣郝景春並其子鳴鸞見列傳

周公祠一在郡城內一在挹江門外運河南岸俱祀

國朝順治初兵備道周亮工

蕭孝子祠在梅花嶺祀孝子蕭日曠並妻節婦俞氏詳列傳

崔公祠在運司右祀鹽運使崔華見列傳

施公祠在梅花嶺下祀知府施世綸見列傳

雙烈女祠在司徒廟東祀烈女池氏霍氏事詳列女傳

寺觀附

法雲寺在大東門外兩淮運司治之南

考證寺舊為謝安宅其姑謝氏為尼即於其宅建

寺名法雲安所植雙檜宋時猶在建炎兵火後遂
 不復存寺相傳固皆謂安第獨張邦基墨莊漫錄
 云是鎮西將軍謝仁祖宅又寶祐志云寺圯為觀
 文呂吉甫宅後更建為寺有藏經院釋迦院

附錄

唐劉禹錫詩雙檜蒼然古貌奇含煙吐霧鬱
 參差晚依禪客當金殿初對將軍映畫旗龍
 象界中成寶蓋鴛鴦瓦上出高枝長明燈是前朝
 焰曾照青青年少時 張祐詩謝家雙植本圖榮
 樹老人亡地變更朱頂鶴知雙蓋偃白眉僧見小
 枝生高臨月殿秋雲影靜入風簷夜雨聲縱使百
 年為上壽綠陰終借暫時行 温庭筠詩晉朝名
 輩此離羣想對濃陰去住分題處尚尋王內史畫
 時應是顧將軍長廊夜靜聲疑雨古殿秋深影似
 雲一下南臺別人世晚泉清籟更誰聞 宋李之
 儀用劉夢得雙檜韻詩故迹悲涼古木奇相公庭
 下蔚相差霜根半露出林虎畫影全舒破賊旗寶

蓋曾回鋪地色節旄遠映插雲枝劉
 郎風韻知誰敵儒帥端能表異時

決定寺搜神記云寺在揚州

旌忠教寺在府治東南相傳即文選樓遺址陳大建間

僧顓公改為寂照院宋隆興間改為功德院祀鄂忠武

王岳飛咸淳間賜今名

興聖寺陳時建張儒童畫壁

逮善寺陳時建陸整畫壁

靜樂寺陳時建張善果畫壁

東安寺陳時建張儒童展子虔畫壁後改為常樂寺

慧日寺隋時建張善果畫壁以上五寺俱在江都見貞

江都縣志 卷十一
觀公私畫史

大明寺寶祐志云在縣西北五里卽古之栖靈寺也又曰西寺以其在隋宮西故名寺枕蜀岡舊有塔

國朝康熙四十四年

御書澄曠二大字額五十八年

御賜綾幡一首懸挂寺內

考證大觀圖經云隋文帝仁壽元年以誕辰詔海內清淨處立塔三十所此其一也於時久旱舍利入塔夜雨大滄後塔燬宋景德元年有浮屠可政募民財於寺中復造七級塔曰多寶塔三年郡守

王化基撰記四年以其事聞於朝賜名曰晉惠建晉惠塔院崇寧間塔有泗州大聖示現始衣紫轉相輪上少頃衣變青復行數匝隱身入相輪遠近士衆見者瞻禮新安江致平嘗爲讚偈又舊志云當塔燬時或見空中祥雲擁一塔而去有國使自高麗回見一僧手擎一塔問之云揚州栖靈寺塔也至州而塔已焚計其時乃遇僧之日也或又云唐武宗毀寺前一年淮南詞客劉隱之遊明州夢汎海見塔東渡海門僧懷信居塔第三層凭闌與隱之言暫送塔過東海旬日而還隱之歸揚州訪

懷信信日記海上相見時否隱之了然省記數夕
大火焚塔俱盡旁有草堂一無所損自是興替不
常至明僅存寺基萬曆間知府吳平山鼎新之未
幾復圯崇徵十二年鹽漕御史楊仁愿重建

附錄

唐劉長卿登揚州栖靈寺塔詩北塔凌空虛

雄觀壓川澤亭亭楚雲外千里看不隔遙對
黃金臺浮輝亂相射盤梯接元氣半壁棲夜魄稍
登諸劫盡若騁排霄翮向是滄洲人已爲青雲客
雨飛千栱霽日在萬家夕鳥去高却低天涯遠如
迫江流入空翠海嶠現微碧向暮期子來誰堪復
行役 李白秋日登揚州栖靈塔詩寶塔凌蒼蒼
登攀覽四荒頂高元氣合標出海雲長萬象分空
界三天接畫梁水搖金刹影日動火珠光鳥拂瓊
簾度霜連繡栱張日隨征路斷心逐去帆揚露洗
梧楸白霜摧橋袖黃玉毫如可見於此照迷方
高適登廣陵栖靈寺塔詩淮南富登臨茲塔信奇

最直上造雲端憑虛納天籟迴然碧海西獨立飛
鳥外始知高興盡適與賞心會連山黯吳門喬木
吞楚塞城池滿窗下物象歸掌內遠思駐江帆暮
情結春靄軒車疑蠢動造化資大塊何必了無身
然後知所退 蔣渙登栖靈寺塔詩三休尋磴道
九折步雲霓灑澗臨江北郊原極海西沙平瓜步
出樹遠綠楊低南指晴天外青峯是會稽 劉禹
錫同樂天登栖靈寺塔詩步步相攜不覺難九層
雲外倚闌干忽然笑語半天上無限遊人舉眼看
白居易與夢得同登栖靈塔詩半月騰騰在廣
陵何樓何塔不同登共憐筋力猶堪在上到栖靈
第九層 宋梅堯臣游大明寺詩秋葉已多蠹古
原看更荒廢城無馬入破塚有狐藏寒日稍清迥
羣山分莽蒼田衣指白水此下是雷塘 國朝萬
石詩古寺栖靈枕蜀岡游人誰復問歐陽已無舍
利今藏塔尚有維摩昔講堂山色過江依檻綠松
聲遶院到門蒼尋幽不厭
歸來晚回首前林下夕陽

救生教寺在縣東五里第二港隋大業四年建宋治平

江都縣志 卷十一 祠祀志
間重建明洪武十三年僧行觀修正統四年僧道琳重修

國朝康熙五十三年僧爾康復構葺之

考證寶祐志云寺有院凡五曰常住院曰瑞像院曰西方院今在寺之舊址曰地藏院曰羅漢院今在州城左東廂皆星居焉又相傳寺之南舊有河入江今河距江二十餘里在隋時則尚爲江岸蓋取拯溺意命名也

長樂寺

考證續高僧傳云隋釋住力住江都長樂寺開皇

十三年建塔五層

開善寺

考證續高僧傳云隋釋法澄聚徒立講於江都開善寺

安樂寺

考證續高僧傳云隋釋慧海周大象二年來江都之儀濤浦創安樂寺

法華寺在縣東北邵伯鎮羅令祠東一名來鶴寺隋大業三年僧普輝建洪武五年僧行山重建正統六年僧元程重修

考證寶祐志作法華禪院周世宗征淮南駐蹕於此因置院焉宋開寶中賜額為寺寺有銅鐘重千斤僧子惠募金所鑄蘇軾有銘嘉靖惟揚志云邵伯來鶴寺與佑聖觀相隣寺觀皆有鶴巢二巢皆有二雛其佑聖之鶴傷於彈二雛待哺於來鶴來鶴之鶴哺猶已子誘之飛鳴全其羽毛人咸異焉時明嘉靖癸巳夏也揚州教授高簡作仁鶴歌以紀之

附錄

宋蘇軾法華寺鐘銘曰無量智惠火燒此無明銅戒定以為模鑄成無漏鐘以汝平等手執彼慈悲撞聲從無所出遍滿無邊空

禪智寺即上方寺在江都縣北五里本隋煬帝故宮一名竹西寺據蜀岡上天氣清朗南徐諸山蒼然在襟袖間寺有石刻吳道子畫寶誌公像李白作讚顏真卿書謂之三絕碑又有蘇軾送李孝博詩石刻埋蔓草間國朝王士徵為司李時拂拭之砌於東廊之壁寺側有蜀井前有月明橋

考證紹熙郡志云舊傳有東西南北四寺此即北方寺煬帝幸江都令合東西南北四寺為一更名上方禪智寺唐劉長卿懷演如上人詩序云寺即上所建五代楊吳時徐知訓與其主隆演汎舟

濁河賞花禪智寺又舊志云宋崇寧間叅政呂惠卿墓其母楊於寺之西乞為功德院後圯明尚書魏驥上方寺碑記云煬帝嘗夜夢遊兜率天宮聽彌陀佛說法既寤遂以離宮施為寺其記寺蹟甚詳萬曆四年兩淮運司崔孔昕重修侍郎顧養謙復為記而魏碑遂湮諸僧斷為砌石矣

附錄

唐劉長卿禪智寺懷演如上人詩絕巘東林寺高僧惠遠公買園隋苑下持鉢楚城中斗極千燈近烟波萬井通遠山低月殿寒水露花宮紺宇焚香靜滄洲接霧空雁來秋色裏霞起早潮東飛錫今何在蒼生待發蒙白雲翻送客庭樹自辭風捨筏追開士回舟狎釣翁平生江海意唯與白鷗同 權德輿送濬上人歸揚州禪智寺詩蠹露宗通法已傳麻衣筇杖去悠然揚州後學應相

待遙想旛花古寺前 杜牧詩雨過一蟬噪飄蕭松桂秋青苔滿堦砌白鳥故遲留暮靄生深樹斜陽下小樓誰知竹西路歌吹是揚州 又將赴宣州留題禪智寺詩故里溪頭松栢雙來時盡日倚

松窗杜陵隋苑已絕國秋晚南遊更渡江 趙嘏和杜侍郎題禪智寺南樓詩樓畔花枝拂檻紅露

天香動滿簾風誰知野寺遺鈿處盡在相如春思中 崔峒宿禪智寺上方詩石林高幾許金刹在

中峰白日空山梵清霜後夜鐘竹窗迴翠壁苔徑入寒松幸接無生法疑心怯所從 羅隱春日獨

遊禪智寺詩遠樹連天水接空幾年行樂舊隋宮花開花謝還如此人去人來自不同鸞鳳調高何

處酒吳牛蹄健滿車風思量只合騰騰醉付與平陳一夢中 又秋日禪智寺見裴郎中題名寄韋

瞻詩野寺疎鐘萬木秋偶尋題處認名侯官離南郡應閑暇地勝東山想駐留百醖濃醪成別夢兩

行垂露澣羈愁心知只有韋公在更對真蹤話舊遊 宋劉敞登禪智寺上方贈同遊諸公詩重岡

抱城起清川帶野回舊都遷陵谷遺寺空池臺修竹入掩藹荒蹊轉崔嵬鳴禽畏人起故老驚客來

置酒感興廢浩歌寄歡哀伊昔游此人於今安在
 哉谷聲春先覺地爽景後頽迨暇適一笑願君盡
 餘杯 韓琦荅袁陟節推游禪智寺詩春去惜餘
 景偶來 郊外觀蕪城千古恨一顧殊悲酸荒祠枕
 大道尚記吳城邗遠近綠陰合水襯紅茨殘隴麥
 齊若翦隨風卷波瀾罷農喜有望守臣心粗寬蕭
 疎禪智寺壞址不甚完叢花亂芍藥籬竹摧琅玕
 空有亭亭栢成行如筆端供帳具朝膳僚案成清
 歡小杜詩板暗樂石曾未刊乘興詣茶圃百步登
 平巒摘焙試烹啜甘挹零露溥午過倦微暑堤路
 騰歸鞍天子憂歲旱引咎古所難列郡承新詔朝
 夕弗敢安况此行春意固不在遊盤朝廷責吏治
 莫若久其官政和氣亦應災沴無由干願循三載
 舊庶幾酬素餐 蘇軾歸宜興留題竹西寺詩三
 首十年歸夢寄西風此去真為田舍翁剝覓蜀岡
 新汲水要攜鄉味過江東 道人勸飲雞蘇水童
 子能煎鶯粟湯暫借藤牀與瓦枕莫教孤負竹風
 涼 此生已覺都無事今歲仍逢大有年山寺歸
 來聞好語野花啼鳥亦欣然 米芾竹西寺詩竹
 西桑柘暮鴉盤特地霜風滿倦顏不用使君相料

理都緣塵土蔽青山 元成廷珪春日遊上方寺
 因過別業詩今日雨晴山亦佳散行聊復寫幽懷
 田翁入郭買春酒野衲下堂留午齋老去任添新
 白髮平生能著幾青鞋醉中天地堪衾枕却笑劉
 伶死便埋 國朝王士徵訪東坡石刻次韻詩昔
 出蜀岡道黃葉鳴秋蟬今來上方寺綠萼破春烟
 坦步寶帶側延眺隋城顛古刹龍象寂殘碣蛛絲
 懸緬思峩峩眉人文采真神仙贈詩日南使賓佐皆
 豪賢邈然竟終古漱墨留春泉老筆欲飛動妙態
 殊便娟空堂響人語怖鴿飛聯翩後遊慨今昔憑
 乎當同然 陳維崧詩二首三生石上向誰論佛
 印東坡想後身今日經聲來破院手披蒼蘚話前
 因 記否毘耶入夢時輕航碧浪點烏絲他年髣
 髴靈山會一卷金筌是本師 吳嘉紀詩拭盡寒
 烟舊蘚痕新題陳蹟共相存老僧漫說因緣事綠
 草春風滿寺門 汪懋麟過禪智寺有懷碩揆上
 人詩秋入麻衣淚點重每過禪智寺聽烟鐘一條拄
 杖三間屋半井寒花十丈松飛錫高人何處去竄
 山新鬼漫相逢此時心亂
 無歸着只繞南沙幾箇峯

山光寺在灣頭鎮前臨漕河隋大業間建

考證按寶祐志即今勝果寺寺為煬帝北宮帝嘗

筮得山火賁卦惡之因以宮為寺名山火後名山

光有院九今並無存唐張祜詩人生只合揚州死

禪智山光好墓田宋王觀詩不須談賁卦興廢古

今同即此五代楊吳時徐知訓為淮南節度副使

知誥自潤州入覲訓與飲於寺宋天禧四年改山

光寺為勝果寺僧請山光舊額更建於縣東南第

三港沙河岸側

附錄

宋宋庠季秋曉出題山光寺詩旦夕人間誼
泛舟北城曲十里望禪刹飄若塵外躅是日

秋雨高
清輝澹
晨旭林
風唱殘
蜩澤稗
下饑鵠
野實迎霜
黃川蕪
傲霜綠
循涯得
微徑捨
檝步幽
麓

佛宇訝
靚深僧
廬互重
複山氣
導真想
天香洗
煩

欲咨余
秉微尚
邱壑及
初服失
計蹈塵
囂虛名
玷

纓轂妄
排金馬
門謬草
紫泥牘
温省專
慎辭中
堦

佐調餽
器偏固
自傾綆
短良難
續何言
一麾出
尚

叅九州
牧恩深
無後疵
顏覩有
餘惡孔
訓懲憚
改

義爰許
頻復竭
來清淨
區冀脫
泥塗辱
醉象或
可

調藩羝
悔前觸
萬緣自
我空至
道非外
勗聊謹
三

載期吾
得事棲
伏梅堯
臣山光
寺詩古
橋經廢

寺蒼蘚
舊離宮
栢殿秋
陰冷蓮
塘暮色
空鳥啼
山

靄裏僧
語竹林
中寂寞
蕪城近
蕭蕭牧
笛風米
芾詩竹
圍杉徑
晚風清
又入山
光寺裏
行一一
過
僧談舊
事遲遲
繞壁認
題名仙
來石畔
懷灰劫
鶴
語池邊
勸後生
三十年
間成底
事空叨
閑祿是
身
榮釋曇
秀詩扁
舟乘興
到山光
古寺臨
流勝氣
藏慚愧
南風知
我意醉
時真境
發天香
蘇軾山
光寺回
次芝上
人韻詩
開裏清
遊似隙
光醉時
真
境發天
藏夢回
拾得吹
來句十
里南風
草木香
賀鑄廣
陵山光
寺夜集
留別黃
材昆仲
詩維舟
山

江者鼎元 卷十一 聖
光步却顧廣陵城十里春風外夾津芳草生漁篷
銜尾來媿爾故人情更卜連牀語神房温自清語
闌夜自久淚燭剪復明開樽兀相視酸涕流袷纓
我本山海士誤遭時網嬰出身兩紀餘何等爲浮
名矧此一分首幾年當合并離憂如驚瀾蕩涵未
易平疎親繫遠邇斯言出荒倉音郵無禁限動訪
兄白雲

天寧禪寺在新城拱辰門外寺建於唐名屢易後復改
爲天寧禪寺明洪武十五年都綱道葵重建正統天順
成化嘉靖間相繼修

國朝康熙二十三年

聖駕南巡臨幸

御書蕭閒二大字懸之萬佛樓三十八年

御書皓月禪心寄懷蘭竹二額禪心澄水月法鼓聚魚龍一
聯懸之方丈四十二年

御書般若妙源額珠林春日永碧澈好風多一聯懸之大樹
堂四十四年

御書淨因二字額懸之塔院

御製幸天寧寺詩空濛爲洗竹風過惜殘梅鳥語當階樹雲
行動早雷晨鐘接豹尾僧舍踏芳埃更覺清心賞塵襟
笑口開

考證寶祐志爲報恩光孝禪寺唐則天證聖元年
建名證聖寺世傳柳毅捨宅爲寺寺有柳長者像

江者鼎志 卷十一
僖宗廣明二年改正勝寺宋大中祥符五年改興
教院政和三年從蔡卞之請以院爲天寧禪寺紹
興十三年詔令天下州軍並立報恩光孝寺以奉
徽宗皇帝香火而寺額得併改云歲久傾圯鄭興
裔趙師宰賈似道先後修葺之又傳寺在東晉時
爲謝太傅安別墅義熙十四年有梵僧佛馱跋陀
羅尊者譯華嚴經於此時右衛將軍褚叔度特往
建業請於謝司空琰求太傅別墅建寺焉號廣陵
福地亦名謝司空寺華嚴經序云尊者於寺別造
履淨華嚴堂譯經改寺爲興嚴寺宋孚禪師在寺

聞鼓角聲悟道作頌曰三十年前未遇時一聲盡
角一聲悲如今枕底無閑夢大小梅花一任吹

附錄

國朝彭桂再遊天寧寺詩乍逢塵市路更得
到精廬危殿前囂甚迴廊後杳如鐘聲迂自
遶竹逕暗猶疎迴日看樓敞閒僧覺院虛經牀人
盡閉齋食鳥還餘凋敝隨民俗仁慈急豕魚利竿
高易豎朝寢廢多墟勝地心偏戀良辰步且徐曾
傳柳毅宅猶說謝安居翻爲探幽盡前遊悵未舒

梵覺禪寺舊名興教禪寺在大東門外蕃釐觀之南

國朝康熙三十八年

御書西來法三大字額

賜寺中懸挂四十四年又

賜額梵覺禪寺雍正六年住持僧明杲重修

考證按明危素正勝寺記所云則興教正勝本一寺而先後易名也然唐廣明所建宋大中祥符所改俱在南進賢坊僧如祖之再建者乃在北進賢坊之念佛巷地相間矣記亦云移正勝爲今額是後之正勝已非前興教故址也或又謂興教卽天寧寺蓋以萬曆陸志於天寧寺下註有唐僖宗廣明二年改證聖寺爲正勝宋大中祥符五年改名興教院遂牽合興教天寧爲一寺耳考陸志引寶祐志所載唐宋改額之年與危記適相反危明初人宜較陸志爲近古可據然寶祐志又在危前矣

天寧寺本唐則天證聖元年建名證聖寺後以正勝改證聖仍其聲而異其字則改正勝自當在前危謂先興教而後正勝此後人所以據爲辨端不知危記內已謂創寺迄今幾四百年其廢興之故久而莫可考證危固且以傳疑後人亦不必強而合之也

附錄

明危素揚州正勝寺記曰有爲浮屠氏學者唐廣明二年建寺於揚州郡城北廂南進賢

坊賜額爲興教禪寺五代燬於兵宋建隆二年僧德欽迺重修創大中祥符五年賜改額爲正勝尋復湮廢乾道間天竺教院僧如祖力學苦行務興其教有董評事諒者捨宅以居之遂爲大隱庵庵在北進賢坊之念佛巷基廣五畝百六十步如祖增加營葺廣其殿堂以安徒衆淳熙十四年請於

州移正勝以為今額如祖示寂楚州淨慧院僧師謙號普明大師以州之命來主是寺始度弟子十有七人善妙善億善倚善德相繼住持景定二年夏寺復燬善德持鉢化金建立殿宇郡人謝都機者施財為塑佛像作藏室以貯經揚旣歸職方江淮諸路設釋教總攝官未幾命善德主治平禪寺仍俾其徒宗祐領寺事加號崇理昌化大師判教門專令甲乙相傳勿變久之棟楹梁桷腐黑撓折延祐元年宗祐乃撤而新之益加宏壯其徒了忠裝飾靈山大士諸天像又建法堂四楹東廊十有一楹作方丈以為燕休之所至了恭作西廊八楹了正以舊藏教庫小復謀崇廣於是教堂門廡庖湏庫庖始獲具完繚以周垣繪以丹碧大修前觀先是如祖乞米飯僧迨咸淳間善德始置土田若干頃以給食又置塔基廣七百餘步於城北以藏遺骨塔南有屋五楹以供祀事了靖所構也厥後宗祐了榮道元了恭了正了泰先後增土田若干頃時則有若了忠了明道壽道茂咸有力焉殫力以相其成者通照行進道濟道成道秀云至正十二年道秀領道住事謂創寺訖今幾四百年其廢

興之故久而無所考證因屬僧行海撰次事狀京師安靜寺住持僧行璽請余為之記蓋佛之說行乎中國而尊崇護衛莫盛於本朝揚為南北之要衝宦官顯人往來無虛日富商大賈居積財貨之淵藪其成此固不可以為甚難然猶經營數十年而後大完以是推之則天下之事豈可易言哉惟能思其成之之艱則不至於壞雖壞必至於復興吾於正勝觀之矣 陸弼秋日訪友興教寺樓居詩野寺蕭條綠水灣入門秋潦沒苔斑登樓落木應愁聽留客深尊且破顏世事悠悠容白眼浮生莽莽負青山淮南叢桂應無恙此日淹留待一攀

東隱菴在興教寺東

柳蔭菴在興教寺西

古木蘭禪院在縣治西卽石塔禪寺康熙四十七年僧

撫生新其堂殿廊廡又建大悲閣及石戒壇於內雍正

七年知縣陸朝璣復古木蘭禪院舊額

考證寶祐志云寺舊爲蒙因顯慶禪院本慧照寺
宋元嘉十七年爲高公寺唐先天元年爲安國寺
乾元中爲木蘭院王定保撫言云王播少孤貧客
揚州木蘭院隨僧齋粥僧厭苦之飯後擊鐘播題
詩於壁上堂已了各西東慙愧闍黎飯後鐘後二
紀播登第出鎮揚州向題詩處已碧紗籠矣因續
之云二十年來塵土面於今始得碧紗籠又詩二
十年前此地遊木蘭花發院新修如今重到經行
處樹老無花僧白頭寺蓋因此以木蘭院著名及

開成三年建石塔墓古佛舍利因改爲石塔寺僧
請以慧照舊額更剏於甘泉山亦名甘泉寺石塔
舊在西門外宋紹定中塔圯後僧從舊址重建至
嘉熙間始移剏於城內浮山觀之西寶祐間賈似
道重修先是戒禪師住石塔寺蘇軾過揚州戒往
迂之軾作石塔寺戒衣銘有石塔得三昧語明崇
徵間果有僧三昧者重修建九佛樓人遂以蘇銘
爲之先識也

附錄

國朝陸朝璣復古木蘭禪院舊額記曰維揚自
六朝以來其地多招提蘭若爲學士大夫登
臨題咏之所乃歷世久遠往往有其地是其名非
使人按圖索記卒難得舊迹之所在者考古家每

命宰江都淮徐觀察康公爲余言維揚古蹟有木蘭禪院爲唐相王播題詩處今額改名石塔寺全非舊觀亦守土者之所當留意也余敬諾以行及至邑於通泗門內稍南上得石塔寺焉按寺諸記云其地本蒙因顯慶禪院宋元嘉十七年朔改爲慧照寺至唐乾元中又改曰木蘭院及後開成三年得古佛舍利於此建石塔藏之因改爲石塔寺而移慧照舊額於甘泉山之甘泉寺宋元祐中蘇長公知揚州有題石塔寺一詩又爲戒禪師作戒衣銘迄今數百餘年舍利無存石塔頽圯猶擁中改之空名甚覺無謂而欲追復其始則顯慶最古然顯慶舊蹟已屬荒渺矣其次慧照亦古然慧照已移額於甘泉矣不若復唐木蘭之額差爲近古而有王播題詩之可爲舊蹟也至考縣志王播本傳稱播長慶初以宰相領揚州浚州之十里港以資漕輓則非無功於此地者雖其詩所題飯後鐘數語爲坡翁之所不取而傳布流俗至今猶爲美談亦古迹之所不可缺耳夫典章文物必師之古以爲據依豈精藍勝地名人事蹟之所寓輒可更其名

號惟恐漸滅之不盡乎余用是益歎觀察公所詔之語深得爲治之大體而身膺民社自不可聽陳迹之湮淪以滋變本蔑古之漸也於是仍復寺之舊額曰古木蘭禪院以付主僧守之庶異其不爲唐闍黎而俾此寺暮鼓朝鐘刹竿不倒亦不必定藉石塔以爲重豈不善歟 宋蘇軾石塔寺戒衣銘石塔得三昧初從戒定入是故常寶護登壇受戒衣吾聞得道人一物不可留云何此法衣補緝戒百衲諸法念已逝此衣非昔在此法非生滅衣益無壞者振此無塵衣洗此無垢人壞則隨他去是故終不壞 又石塔寺詩饑眼眩西東詩腸忘蚤晏雖知燈是火不悟鐘非飯山僧異漂母但可供一莞胡爲三十年記憶作此訕齋厨養若人無益祗遺患乃知飯後鐘闍黎蓋巨眼 又端午小集石塔寺謝毛玉仲惠茶詩我生亦何須一飽萬想滅胡爲設方丈養此膚寸舌邇來又衰病過午飯輒噎繆爲淮海帥每愧厨傳缺爨無欲清人奉使免內熱空煩赤泥印遠致紫玉玦爲君代羔豚歌舞菰黍節禪牕麗午景蜀井出冰雪坐客皆可人鼎器手自潔金釵候湯眼魚蟹亦應訣遂令香

色味一日備三絕報君不虛受知我非輕啜
 無咎次韻蘇翰林五日揚州石塔寺烹茶詩唐來
 木蘭寺遺跡今未滅僧鐘嘲節後語出飢客舌今
 公食方丈玉茗攄噫當年卧江湖不泣逐臣块
 中和似此茗受水不易節輕塵散羅麴亂乳發甌
 雪佳辰雜蘭艾共弔楚纍潔老謙三昧手心得非
 口訣誰知此間妙我欲希超絕持誇淮北士湯餅
 供朝啜 元成廷珪同諸公游西城木蘭院詩三
 月西城風日好短筇隨意踏晴沙王孫不識薜蘿
 草童子來尋枸杞芽白髮有人中卯酒清泉無火
 煮春茶山扉寂寂僧歸晚落盡辛夸一樹花 明
 蔣方詩有寺藏黃葉無人破白雲僧閒初結社禪
 寂獨稀羣石塔光長炯金沙路自分一燈相對久
 寒日了忘曛 國朝桑豸詩紗籠不見舊時題但
 見寒烟罨塔低從古王孫
 艱一飯鐘聲何必怨闍黎

甘泉寺在甘泉山即唐開成間移慧照舊額於此一名

慧照寺

惠照教寺在縣北三里大儀鄉唐景龍間僧省躬建明

洪武四年僧如淵重建正統三年僧福銘修

國朝康熙十七年僧東雲重修

考證萬曆陸志云即石塔寺分建者也按唐開成

三年改古慧照為石塔寺僧請舊額更建於甘泉

山亦名甘泉寺則甘泉之慧照乃從石塔分建矣

寺名既惠與慧異而甘泉山在城西三十里此寺

則在城北三里道里之遠近亦岐且開成係唐文

宗年號僧於此時始請石塔寺之舊額慧照改建

景龍係唐中宗年號惠照已建於此時是仍在肅

江者縣志 卷十一
宗乾元中改古慧照寺為木蘭院之前也陸志謂
卽石塔分建未知何考今寺內亦有古木蘭院額
或卽根源陸志耶

寶勝教寺在縣南楊子橋唐貞觀間僧智端建洪武五
年僧妙敬重建宣德五年僧源勝修後為江水坍沒楊
州衛指揮李鎧僧太虛遷於城東三里

附錄

明陳獻章登寶勝寺百福樓詩巢許夔龍不
兩能江湖去任任騰騰他鄉今夜揚州月春

閣高歌寶勝僧藥氣氤氳牕下枕香烟繚繞佛前
燈道人本是羅浮客夢入飛雲第一層 莊景次
韻詩隨時起倒我無能說着溪山夢亦騰此地每
憐君獨徃前身未必我皆僧夕陽老樹生成畫明
月青天普照燈別後有詩何處寫白雲回首塔層
層 葉觀春日遊寶勝寺詩郊原緩步尋佳境古

寺悠然洗俗塵醉裏乾坤渾樂事空中樓閣幾閒
人芳林翠鬱鶯聲巧寶塔光凝草色新寂寞禪堂
僧已去白雲
空鎖楚江春

天王教寺在縣南楊子橋西唐貞觀間僧淮海建洪武
四年僧普富重建景泰二年僧定海修

太平寺在城南楊子橋唐貞觀間建明嘉靖間僧圓早
修

大聖寺在縣東北三十里唐高宗時建明天啟七年修

國朝康熙三十五年僧自侶雲岫重修

開元寺在府城東五十里唐時建

國朝順治十八年遷寺於傅李橋

附錄

唐劉長卿冬夜宿揚州開元寺烈公房送侍御之江東詩遷客投吳越窮陰淮海凝中原

馳困獸萬里接饑鷹寂寂蓮宇下愛君心自弘空堂來霜氣永夜明青燈此去爾何恨近名予未能

鑪峰若便道為訪東林僧盧綸雨後登開元寺南樓因寄西巖警上人詩過雨開樓看晚虹白雲

相逐水相通寒蟬噪暮野無岸古樹傷秋天有風數穗遠烟凝壠上一枝繁果憶山中何言暫別東

林友惆悵人間事不同羅隱廣陵開元寺閣上作詩滿檻山川漾落暉檻前前事去如飛雲中雞

犬劉安過月裏笙歌煬帝歸江蹙海門帆散去地吞淮口樹相依紅樓翠幕知多少長向東風有是非

孝感寺

考證萬曆府志云大師佛唐貞元中客廣陵居孝

感寺又牛僧孺幽怪錄載明皇觀廣陵燈事廣陵

奏云上元夜有仙人乘綵雲自西來臨孝感寺奏

霓裳一曲曲終而去

向善寺

考證萬曆府志云靈識和尚唐貞元十六年於揚

州江陽縣向善寺示寂博陵崔膺述有塔銘

附錄

崔膺述塔銘云雲生虛空行無所止偶過為雨施澤則已羣生既蘇昏醉醒起乃順大化

反正太始點化黎昨哀傾都市人妄悲傷我無生死示身于世如漚浮水起滅相尊天壽一矣塔開

九原法流千祀後人聞風仰德於此

菩提寺在縣城東北二十里本唐古刹明萬曆間開芒

稻河水漲寺圮

江者鼎元 卷一 國朝康熙五十六年里人韋以訓倡募重建

白塔寺在自塔河旁今圯

附錄

唐顧况酬揚州白塔寺永上人詩塔上是何緣香燈續細烟松枝當塵尾柳絮替蠶綿浮草經行遍空花義趣圓我來雖為法暫借一床眠

清涼講寺在縣南善應鄉唐大曆間建洪武五年僧良

瑜重建正統十四年修

西方禪寺一在府西四望亭北唐永貞間僧智完建明

洪武五年僧普德重建永樂十四年僧宗鐔修正統三

年都綱自性重修一在瓜洲十四坊舊蹟久湮嘉靖十

四年任持僧法海重建

華林寺

考證神僧傳云唐釋靈坦元和五年居揚州華林

寺寺內有大將軍張遼墓寺僧多為鬼物惑亂坦

居之寂然無事矣

大雲寺

考證神僧傳云唐鑒貞禪師出家于此在廣陵江

陽縣

慶雲寺見獨孤及塢銘在揚州唐詩僧靈一居此寺

鎮國禪院唐咸通間建

考證萬曆府志云舉直禪師唐懿宗子僖宗弟也

咸通間杖錫遊方抵揚州以太平倉基地亟請于朝詔以其地爲鎮國禪院居之仍賜號舉直後塋于院隅立浮圖五級迨宋元豐末發藏及隧得函柩全骨不解聯若鉤鎖俄見舍利發異光人驚異之

梵行教寺在縣東邵伯鎮

考證萬曆縣志云晉寧康三年僧行密建明洪武初官以寺基爲水馬驛三年僧妙用遷寺於本鎮惠政橋西正統十四年僧道暹重修嘉靖八年賜寺額又引寶祐志作梵行禪院唐乾寧元年楊行

密建名觀音院按寶祐志則寺建於唐何以晉已
有此或以僧與楊同名行密誤傳耶宋蘇軾有梵
行禪院山茶花詩載物產山茶下

鐵佛寺在鎮淮門北

考證寶祐志云舊在堡城東本唐楊行密故宅光
化間以其宅爲院名光孝院後傳僧伽嘗現於此
釋徒所謂顯化第二處也宋建隆間鑄鐵佛因名
天聖間復爲光化寺崇寧間改崇寧寺政和中復
今額舊有寶塔不存端平中寺圯淳熙九年僧卽
威烈王廟東重建明洪武十五年僧得信修宣德

九年僧懷極重修殿後有雙檜尙是宋元間物上
竦無枝取其皮焚之如沉香

附錄

宋韓琦鐵佛寺會僚友詩二首寺枕隋家廢苑邊登高還此會僚賢凭闌莫賦悲秋事剩

然黃花送酒船 誰言秋色不如春及到重陽景

自新隨分笙歌行樂處菊花黃子更宜人 蘇轍

題光化塔詩山頭孤塔闕真人云是僧伽第二身

處處金錢追晚供家家蠶麥保新春欲求世外無

心地一掃胷中累劫塵方丈近聞延老宿清朝留

客語逡巡 秦觀次韻子由題光化塔詩古佛悲

憐得度人應緣來現比邱身水流月落知何處花

發鶯啼又一春方外笑談清似玉夢中煩惱細如

塵老僧自說從居此却悔平時事遠巡 國朝鄧

漢儀九月鐵佛寺同宗觀登高詩豆葉全黃野黍

肥玉簫舊路是耶非亂雲古寺沈邊柝落日高臺

冷客衣莫訝邱墳蒼鼠竄頻看松栝老龍歸好將

濁酒酬佳節此

際將軍戲馬稀

建隆禪寺在城北壽寧街寺建於宋明嘉靖二十七年

僧道秀修

國朝康熙二十六年僧行乘重修四十六年

御書閒雲任棲宿密雨斷飄零一聯懸寺內

考證寶祐志云舊在城西二十四里西華臺宋燕

翼貽謀錄云太祖親征李重進以御營建寺所御

之榻留焉後僧徒共建一殿申嚴崇奉名彰武殿

且請降御容民庶瞻仰乃命翰林畫工圖寫嚴衛

而往仍賜供具景德二年八月命中使前往奉安

遇朔望州郡率官寮朝禮王禹偁郭正俱爲之記

靖康元年二月徽宗至揚州嘗詣寺行香建炎初
 寺圯嘉熙三年更剏於城之壽寧街寶祐間賈似
 道鎮揚州復新彰武殿因葺其寺

附錄

宋王禹偁揚州建隆寺碑記曰唐貞觀中制
 以天下戰陣處為寺且命虞世南李百藥岑
 文本之徒刊勒碑銘紀述功業傳諸簡冊燦然可
 觀蓋聖人不欲無罪而殺一夫無名而荒寸土及
 乎諸侯阻兵百姓後驅人以戰事不獲已矢石
 之下死傷則多徇義効忠有足哀者雖復贈官爵
 錄子孫誠有勸於生懼無益於死以為漢明之後
 釋教誕興謂冥冥之中有輪迴之數皆使精魄復
 生人天其道如何事佛誦經而已由是交兵之地
 捨為梵宮田不耕而有名也死事之人盡離鬼趣
 士捐生而無恨也帝王所尚今古攸同雖有服儒
 冠而執名教者又安知其果不然耶我太祖皇帝
 授禪於周啓封在宋朱旗所指黔首又安惟李重
 進作帥江都嬰城構逆時建隆元年九月也乃命

故中書令石公統王師以討之十有二月傳於城
 下於是建行宮迎法駕是月十一日太祖至大儀
 驛距廣陵六十里夜半而城陷詔宣徽北院使李
 公知軍府事尋以行在立為梵宮取僧之有德行
 者處焉是時先寺主道暉本居孝先眾所推擇李
 公列狀以聞即可其奏仍改法名為道堅以紀年
 為寺額墾田四頃隸省一莊咸以賜之供香積而
 飯緇流也道堅既沒智速嗣之智速又沒義幽繼
 之義幽超化大師也以淳化二年歸寂義隆顯仁
 監而主焉皆超化大師弟子也自國初至今凡四
 十載日供僧不減六十人像設莊嚴經教具備禮
 佛有殿演法有堂齋庖在東僧寢在右奧有室供
 湯沐焉外有亭給登眺焉廊廡翼舒門扉洞啓修
 竹交映碧流縈回實藩服之勝遊淮海之福田耳
 先是太祖將反鑿輿留其御榻忌晨供帳於今尚
 存嗚呼戰伐所亡人骨已朽乘茲善果皆出冥途
 豈知不再事朝廷復為臣子歟義隆等謂修建以
 來碑誌未立以某出從翰苑守是郡條宜為斯文
 理不可讓是時大行晏駕聖主承祧至道三年四
 月也銘曰神道設教儒所崇佛法度人釋之宗王

者草昧多屯蒙乃有征伐揚武功野必死戰城必
 攻出入矢石豈梯衝殞首喪元爭效忠聖人念爾
 心所恫詔捨戰地為梵宮游魂精氣或感通拔爾
 出離冥塗中恩異文王枯骨塋事殊楚子京觀封
 香爐鐘磬飄天風四十餘年僧憧憧止戈偃武文
 軌同三葉重光自建隆祐我聖祚垂無窮 梅堯
 臣詩荒臺殘壘舊名邦曾說王師此受降西漢衣
 冠拜原廟五天龍象護經牕蜀岡井味人猶品隋
 帝宮基闕尚雙自古興亡不須問風鈴閑聽響幡
 幢 釋參寥建隆秋夜詩二首梵唄聲沈香霧銷
 月明金殿影岩堯夜深惟有龕燈在風露滿庭人
 寂寥 娟娟雲月照窓扉紙帳行開夢覺時庭下
 風篁自成韻吹簫安用玉人為 國朝顧圖河過
 建隆寺贈遠峰上人詩豈知將廢寺能住最高僧
 黃剩前朝瓦青存古殿燈坐禪三品葉
 傳法一枝藤足傲南林刹終朝粥鼓騰

靜慧寺即靜慧園在南門外宋時剏本席氏園改為寺

國朝順治間僧照吉始建禪堂僧道恣應

詔入都

賜號弘覺國師又

御書賜大護法不見僧過善知識能調物情一聯七言詩一

幅總河楊茂勳建大殿康熙二年巡鹽御史張問政知

府雷應元重建天王殿廟宇寮房四十四年

聖駕南巡

御賜直成佛國香雲界不數淮山桂樹叢一聯四十六年

御賜靜慧寺額又

御製幸靜慧園七言律詩紅闌橋轉白蘋灣疊石參差積翠

間畫舸分流簾下水秋花倒影鏡中山風微瑤島歸雲

近日落青霄舞鶴還乘興欲成蘭沼詠偶從機務得餘閒

龍興寺宋僧慧禮建今圮

考證宋王觀揚州芍藥譜序云花品舊傳龍興寺山子羅漢觀音彌陀之四院冠於此州

附錄

宋王安石揚州龍興講院記曰予少時客遊金陵浮屠慧禮者從予遊予既吏淮南而慧禮得龍興佛舍與其徒日講其師之說嘗出而過焉庫屋數十椽上破而旁穿側出而視後則榛棘出人不見垣端指以語予曰吾將除此而宮之雖然其成也不以私吾後必求時之能行吾道者付之願記以示後之人使不得私焉當是時禮方丐食飲以卒日視其居枵然余特戲曰始成之吾記無難者後四年來曰昔之所欲為凡百二十楹賴州人蔣氏之力既皆成蓋有述焉噫何其能也蓋

慧禮者予知之其行謹潔學博而才敏而又卒之以不私宜成此不難也今夫衣冠而學者必曰自孔氏孔氏之道易行也非有苦身窘形離性禁欲若彼之難也而士之行可一鄉才足一官者常少而浮屠之寺廟被四海則彼其所謂材者寧獨禮耶以彼之材由此之道去至難而就甚易宜其能也嗚呼失之此而彼得焉其有以也夫王令龍興雙樹詩春城花草窮朱殷俗兒趨走脚欲穿閑來無恟喜自適時到雙樹為奇觀莊如天官植幢蓋毅若壯士蒼衣冠老枝又牙忽並出似欲併力擎青天靈根深盤不可究疑與地軸相拘攣不知培栽竟誰手而又始植為何年行捫步遶不可問但見茂色連雲烟東風牽人少遊此佛屋日日重門關雖有大蔭人不及於此尤得志士憐束蒿為楹樗為柱居者畧不憂其顛廼令遺材抱美植不得總載楠與椽高堂欹傾未支拄匠者日亦經其邊不思大榦有強用反以斧鈍難其堅吁哉誰是愛材者空知惜此雙樹篇晁无咎揚州雜韻詩龍興寺裏青雲榦后土祠中白雪葩五百年間城郭改空留鴨脚伴瓊花韓琦和袁陟節推龍興

寺芍藥詩廣陵芍藥正奇美名與洛花相上下洛
 花年來品格卑所在隨人趨高價接頭着處騁新
 妍輕去本根無顧藉不論姚花與魏花只供俗目
 陪妖姹廣陵之花性絕高得地不移歸造化大豪
 大力或強遷費盡壅培無艷冶東君固是花之主
 肯嫁遂令天下走香名彷彿丹青競誇詫以此揚
 花較洛花自合揚花推定霸其間絕色可粗陳天
 工着意誠堪訝仙家冠子鏤紅雲金線粧治無匹
 亞旋心體弱不勝枝寶髻欹斜猶墮馬水雪肌膚
 一纈斑新試守宮明似赭雙頭兩兩最多情象物
 更呈鞍面窠樓子亭亭欠姿媚特有怪狀堪圖寫
 見者方知畫不真未見直疑傳者詐前賢大欲巧
 賦詠片言未出心先怕天上人間少其比不似餘
 芳資假借我來淮海涉三春三訪龍興舊僧舍問
 得龍興好事僧每歲看承不敢暇後園栽植雖甚
 蕃及見花成由取捨出羣標致必驚人方徒矮壇
 臨大廈客來只見軒檻前國艷天姿相照射因知
 靈種本自然須憑精識能陶冶君子果有育材心請視維揚種花者

壽寧寺

考證宋歐陽修于役志云寺本徐知誥故第李氏

建國以為孝先寺太平興國改今名寺甚宏壯畫

壁尤妙周世宗入揚州時以為行宮盡朽壤之惟

經藏院畫元奘取經一壁獨在尤為絕筆又宋史

建炎二年高宗駐蹕揚州十月享太廟神主於壽

寧寺三年正月奉西京會聖宮祖宗御容於寺中

附錄

宋劉敞行詣揚州壽寧寺詩隋宮老荆棘淮

水上休甲古城邊清蹕仍過此高臺亦宛然殿空

生影響畫古剝丹元缺甃驚跳鮒遺碑失記年廢
興真可感耆舊每多傳一咏蕪城作斜陽聞暮蟬
蘇軾過揚州壽寧文覺顯公房詩闌斑碎玉養

江者鼎元
卷一
三
菖蒲一勺清泉滿石盂淨几明
隱書小楷便同爾雅註蟲魚

楊子寺在楊子橋見宋蘇頌聲隅先生祠堂記

雍熙寺

附錄

宋呂本中揚州雍熙寺納涼詩高樓有餘涼
但見旗脚動鳥語簷角來仰聽風響弄江山
舊還往草木老賓從平生一笑適可
得萬鈞重條然六尺床更許佳月共

遠望寺在吳公臺側見名勝志

投子教寺在縣東宜陵鎮宋開寶間僧夢菴建明洪武

三年僧徵全修景泰四年僧景文重修投子禪師有語

錄傳世

釋迦教寺在縣東北邵伯鎮卽寶公寺宋元祐五年僧

惠朗建明景泰三年僧文演重建

國朝康熙五十二年僧了愚重修

圓通寺在縣東北二里官河西岸卽北來寺宋乾道間

僧道紀建明景泰三年災四年僧曇謚重建成化十一

年僧惠體拓地改修

北大同寺在大橋鎮南袁家灣宋淳熙二年建明成化

間住持僧守能奉召入京命建國齋賜紫衣寺有遺像

尚存

嵩山寺在瓜洲鎮宋端平間僧智觀建明洪武五年僧

道林重建宣德八年僧永鎮修

開福寺

考證萬曆府志云宋淳祐八年開福寺大士殿基產芝三莖寺今圯

北興教寺在縣西北宋寶祐間建

考證舊有唐景雲三年揚州處置使杜佑題名八角石柱遺寺址內久沒於池水中明成化十六年旱池涸柱復出好事者多摩搨以傳

棘林寺在瓜洲鎮新壩宋咸淳間建

壽安教寺一在府治東南舊馬監巷宋景定間建元至正七年僧德寧重建明正統六年僧淨廣重修一在縣

西北三里大儀鄉宋紹興間建明洪武十三年僧道智重建正統十年僧智登修里人稱為北壽安寺

龜山寺在瓜洲鎮見金史

蓮性禪寺在縣西北三里善應鄉舊名法海禪寺元至元間僧為正建明洪武初僧曇勇修正統元年僧福宏增建

國朝康熙四十四年

聖駕南巡臨幸

御賜蓮性禪寺額

附錄

明桑喬詩野寺濱寒水山僧卧白雲鳥啼花竹杳日出曙烟分寶筏迷方渡金經貝葉文

西郊天宇豁山勢欲糾紛 吳兆詩野航時可繫
 林寺畫猶局古木無年歲清陰滿戶庭客來方禮
 磬僧坐但翻經烟起炊茶竈聲開汲井瓶窗過湖
 鳥白簷挂葉蟲青蔬飯欣然飽徐徐步遠坰 國
 朝趙吉士詩二首領畧雲林意霜高看綺叢畫屏
 堆繡繪秋色放春紅六葉敷金地四山繞夢中幽
 尋入淨苑蒼翠鬱巖櫳 寶相金谷地窮泉朽壤
 隈松仁猿攫取霜信雁傳來客供公香積山炊掃
 葉堆綠池堪澡 漱早已絕零埃

觀音山寺在縣西北大儀鄉元至元間僧申律建明洪

武二十年僧惠整重建題名功德山俗名觀音閣

考證寶祐志作摘星寺高宗本維揚志云即古摘

星亭址俗傳為迷樓故址譌也

附錄

明高宗本詩邗江江上望揚州依舊孤城枕
 水頭殿宇高低雲外寺帆檣遠近客邊舟草

荒螢苑空殘照樹接雷塘變晚秋一自川原作陵
 谷更無人解說迷樓 張惟恕詩風吹樹雪點江
 流隋帝行宮翠霧浮十載豪華留鳳輦千年踪跡
 歎龍溝牙檣錦纜笙歌歇古殿荒臺蘆荻秋人世
 變遷元有數且開尊酒破離愁 徐九皋詩聯鑣
 躋鷺嶺瀟灑出塵氛石磴霾青靄龍宮隱白雲江
 流天外合山勢望中分無限風雲意蓬壺未遣聞
 葉相詩殿閣樓雲野色新埤梧垣竹遠紅塵上
 方燈火仍輝映前代山河幾廢湮曬衲溪邊僧已
 老聽經林下鹿長馴風光莫訝來游晚坐看巖松
 別有春 又同焦侍御登觀音閣詩仙史乘驄舊
 帝城郊坰小隊正啼鶯天留笙磬逢僧寺春引江
 山入酒觥魏闕幾函封事草隋樓一繫宦遊情打
 魚渡曲藤蘿外又與逋人解宿醒 盛儀詩眺遠
 登危得大觀風前那更怯春寒魚鱗入饌皆新薦
 鳥背憑欄是俯看蜀道地形猶迤邐隋堤烟柳半
 凋殘茲行本為巡遊出况復良辰有二難 王大
 用詩乘驄柱史開清讌跨鶴揚州得勝遊北極風
 雲方在遠上元燈火未全收隱隆地脉來三峽佳
 麗天成占十洲日暮登樓猶佇目白波芳草共悠

悠程文德詩四首春盡維揚留客棹興隨驄馬
 出西郊鳴鐘朱閣迎青客一派笙歌下碧霄
 看飛鳥穿林外俯聽吹簫出鏡中二十四橋不
 見更從何處覓離宮高閣南臨迴楚岫虛亭北
 望入淮天山川不改遊人異獨立斜陽思惘然
 九曲池荒蔓草深摘星樓墜野雲陰憑君莫問前
 朝事明日重來即古今國朝宗元鼎詩山閣當
 年翠輦臨酒徒今復醉祠陰江天漠漠迷烟草宮
 沼沉沉戲野禽弔古不知人幾換傷春還恐鬢先
 侵回思十五年前事碧樹笙吹小院深李頎詩
 來尋大業舊離宮已換招提事不同鐘磬遠穿江
 樹外釵鈿疑墮野花中遙峯入檻寒相逼故國登
 樓夢久空佳麗寂寥俱
 一瞬莫教憑弔起悲風

觀音教寺一在府治西一在縣東六十里歸仁鄉並元

大德間建

廣福寺在縣東三里第二港元大德間建

普門菴在城東元至順間僧志如建

附錄

明危素揚州普門禪菴記云揚州郡城東隅

普門禪菴在焉初至大三年僧志如置地若
 干畝至順間創建佛殿塑阿彌陀佛及阿羅漢諸
 天像法堂六楹東廊十有一楹西廊十有四楹置
 蔬圃十有七畝於東城之下元統三年築三墪於
 江都縣之永真鄉其徒行徵作方丈之室行定作
 三門八楹方志如之經始也囊鉢不蓄一錢至以
 其說動人或伐材於山輦石於淵捐金於帑遠近
 相助其應如響前淮東宣慰使鐵木禿古思寔始
 終相成之無土田以為恒產乞食以給眾揚為南
 北都會其學者經行無虛日輒駐足是庵待之未
 嘗厭倦又制為規訓戒勵將來令甲乙以次相傳
 於後年七十有五而終用其法茶毗得舍利無數
 志如蚤學於蒙山異禪師禪師授以十六字為宗
 派曰志行願清普賢妙道智慧圓明正宗可紹志
 如所度之弟子皆冠以行字從其師之命也至正
 十三年行戒領菴事乃具營造歲月師弟子傳序
 因京師安淨寺行璽求為之記余聞異禪師振其

道於江左當時學者多歸嚮之蓋其所造詣甚深非紛紛假托欺誑以從事乎口耳者也故志如之建此菴非苟焉安逸於旦暮之頃是以迄今恪遵律度相率不怠則其身教固可知已堅定而不遷汨撓而不變是在夫遊其門者何如耳居此庵尚思無負其志哉

寶輪寺在縣南門外三里明萬曆間僧寂楞建本名善慶菴

國朝康熙四十四年

御賜寶輪寺額

附錄 國朝許迎年過寶輪寺晤慧孚和尚詩江雲渺渺出晴嵐竹裏尋行到小庵行者聞鐘添

佛火老僧見客閉經函春開慧眼花雙樹天浸禪心月一潭何日樊籠方解脫草衣蔬食我能甘

文峰寺在城南二里官河東岸萬曆十年建浮圖七級

於此因併建寺俱以文峰名

附錄 明王世貞記曰有介胃之士曰楊天祥者嘗遊江南大帥軍中其拳勇超出流輩遠甚而

恂恂若不能言者至於負節槩信然諾則儒生所不及也余以唐叔達故知之既乃得其本末則少

嘗為僧少林寺從師披剃命名曰鐘存托鉢維揚至南關之外福國菴結夏有感於阿育王事發希

有想擬朔寶塔今大中丞邵公時以御史按其地聞而嘉之給帖化募維揚故多名商估客觀天祥

距躍曲踴伎擊劍舞之狀若猿猱鬼神而駭焉爭出其貲以佐木石磚甃之費可三千金不三載而

塔成御史榜之曰文峰塔蓋取於堪輿家言為一方科甲助也天祥後忽蓄髮仍故姓名有妻子然

猶不能忘情於茲塔而再拜乞予記之余居恒慨諸郡縣吾夫子十畝之宮徃徃殘剝旁風下雨有

司相顧束手而策無所出計其費不過千金或半之耳然不能從四民募一環石粟其人過之漫然

而不小置念豈因果之說勝而名教之用屈邪天祥既用其說以一念而成此勝果不宜旋捨而從

俗既已從俗必其心之悔之不宜復以此塔求余
記也苟以余記成其名則所謂不住色而行布施
者又何說邪天祥於是乎兩墮矣夫是塔之費三
千金可以三十五學宮然而未有能損一環石粟
及塔成而借堪輿家言以為科甲助然則為吾儒
者亦兩墮也余不能辨第以語天祥異日懺宿慙
而禮誦於茲塔之下其去西方尚當不遠也哉塔
既成其簷角寶瓶木鈴則今住持僧任之僧名亦
鎮存固
不偶也

藏經院在新城左衛街後石牌樓明萬曆間太監魯保
請藏經頒寺賜額萬壽有碑天啓間僧鎮滿建毘盧閣
戒臺於後邑人大理姚思孝為之記

地藏菴在宛虹橋西

三祝菴在新城運司巷東圈門明萬曆三十八年建

國朝康熙四十九年重建

普慈寺在洗馬橋西明隆慶間重建

廣蔭菴在新城蔣家橋明萬曆間僧性融建

定慧菴在新城東二鋪明時建

福國寺在安江門外運河岸側明季僧明道建本名福

緣菴

國朝初

賜今名雍正元年住持僧元度重修增建萬佛樓

附錄

錢謙益廣陵登福緣佛閣詩危樓切太空塵
壑俯冥濛度世香燈裏降魔應器中上方三
界在八表一雲同鈴鐸
人天語如聞替戾風

護國寺在東關外河岸明崇徵八年建

萬壽寺在宜陵鎮東三十里

慈雲菴在南門外明處士王醇晚年焚修於此顏其室

曰寶葉樓曰湛華幢

考證寶葉樓集序云明馮子王使君為詩人王醇

建在郡城南之澳上襟坡帶市平疇如掌流潮送

響竹樹交蔭廣陵勝境也

附錄

明王醇湛華幢詩水之積不深不足表其清茅茨非水次不得水之情雲房相窈窕雪竇

交虛明修篁亞繚垣柳周四楹銀灣束天色碧浪瀉風聲白晝如深谷淨根寡所營心華盡澄湛

至妙莫可名

寶樹林見府志

高旻寺在安江門外十五里三汊河西岸寺有塔名天

中塔康熙四十年兩淮商人於寺內建行宮

聖駕駐蹕臨幸

御書賜高旻寺額又雲表天風額懸堦內後復

賜大內所供金佛遣學士高士奇內務府丁藻保齋送四十

四年

御賜龍歸法座聽禪偈鶴傍香烟養道心殿灑楊枝水爐焚

栢子香二聯四十六年

御書晴川遠適菴蔭軒凝遠三額懸寺內

江都縣志 卷一
御製高旻寺碑記茱萸灣者乃維揚俗稱寶塢灣也居三岔河之中南眺金焦諸峰北枕蜀岡之麓足爲淮南勝地凡上江由儀真下江由瓜步至此皆會歸運河而北上也朕比歲以來躬臨河干諮詢經畫者屢矣每抵一處未嘗不懷保編氓施惠工商故兩淮鹽課永減額徵停輸贏美又聞往來迎送費用私派者甚鉅特頒嚴旨盡爲禁止從此商民得以安席漸皆獲所則朕之巡幸者少有益乎朕三十八年奉

皇太后鑾輿偕行晨昏侍養視河旣畢勉從輿請濟江而南周覽吳會民生風俗見茱萸灣塢歲久寢圯朕欲頒內帑

畧加修葺爲

皇太后祝釐而衆商以被澤優渥不待期會踴躍赴功庀材協力唯恐或後不日告竣舊刹式廓鼎新莊嚴弘敞兼以翬飛傑閣憑高四眺臨大江通南北因書額賜之曰高旻寺勒文於石垂示久遠惟是雨暘應時河海清晏舉一世共臻於仁壽之域斯四十餘年宵旰勤民之念所厚期也卽此塢工蕝事具見羣情愛戴之誼出於至誠是亦有不可泯者爰爲書之以志始末云康熙四十三年秋九月重陽日書

御製幸茱萸灣行宮登五雲樓詩財賦稱茲地時巡復此經

江者鼎元 卷十一
春膏宜豆麥煙景遍林亭靡麗風應換敦龐訓屢形施
恩頻已責聊爾翠華停

御製述懷近體詩有序朕每至南方覽景物雅趣川澤秀麗
者靡不賞玩移時也雖身居九五樂佳山水之情與衆
何異但不至曠日遲久有累居民耳所以一目卽過者
亦恐後人錯借口實而不知所以然也至於茱萸灣之
行宮乃係鹽商百姓感恩之誠而建起雖不與地方官
吏但工價不下數千嘗覽漢書文帝惜露臺百金後世
稱之况爲三宿所費十倍於此乎故作述懷近體一律
以自警又粘之壁間以示維揚之衆又駐塔灣見物華

先存蔀屋重桑麻惠風徧拂維揚市沛澤均霑吳越家
作鑑道君開艮嶽長嘘煬帝溺瓊花澆胥經史安邦用
莫遣爭能縱欲奢

御製賜寺僧紀蔭詩并跋春夢深沉新刹中陡聞清磬在林
東方疑般若眞非相不解金經盡是空鼻豎眉橫無著
落胥寬境濶有塵籠毫光咫尺臨高眺滿目江干淑景
融覽奏章少倦甲夜得寢又被清磬驚醒復睡夢中作
成起時已忘少半故前後增補以成四韻贈紀蔭老和
尙邇來未臨法書久不作字手澀難以運管字不甚佳

附錄

國朝李楷天中塔賦有序塔於三泖創也古
有栖霞塔在蜀岡今不山脊而水滸調御子

事佛之標也地理家或言有禪於揚州故調御子
 獨任之他日又夢陶弘景紀塔以文已鏤碑版棗
 栢居士率爾賦之卓哉浮圖之為狀也幾埒天半
 之岷峨偉哉華陽之為文也如觀掌上之菴摩乃
 若龍角拔十洲鴈魄灣三光重簷低風雨六牕俯
 雪霜自西徂東肇漢歷唐屹立畿甸逮於侯方九
 州之內不知其幾阿育也又何羨乎今日之維揚
 耶以其浩劫而言之自今日而為古苟華藏之為
 一身視大千其如焦腑閭浮雖小於蚊虻真人亦
 希乎鶴羽故高脫於盍塵之氛霾孤立乎海天之
 神部貌鬱羅之蕭臺作帝釋之靈宇尚可以爽延
 六氣平臨九土企雲輶於飛樓來風駟於仙塢譬
 彼麟徵聖於廣桑鳳感圖於元扈惟境迴而冥通
 斯功竣而冲舉何况覺皇御紀梵天朝宗三輪胥
 奠七級斯崇樹擎霄之八柱峙礙日之一峰表鳥
 王於金翅驅波旬之毒龍鈴鐸流音常作迦陵之
 響霞暉散彩如分舍利之宗者乎爾乃考卜龜蔡
 相視陽陰如作都邑載用肅欽命青鳥於圭表倣
 聚沙於香林景純淳風一行筠松之屬公輸胡寬
 陶人石工之輩莫不殫其技窮其心嘉東南之都

會惟江海之曲潯象恒河於邗水比奈苑於淮岑
 蓋眾流之所迴薄元氣之所酌斟如天華之蓓蕾
 若龍淵之鍔鐔域近蕭梁開蓮疆之菡萏化敷天
 竺布寶所之黃金乃其伐山礮砥埏木植甄旁築
 廣野下錮重泉鳩材於役申令維宣董以官吏期
 以歲年匪蒼氓之脂膏非紫禁之金錢斃下為高
 基穹窿於缺穴成功以眾集畚鍤於江烟豈因山
 而架構迺憑虛以參天或自其遠者而觀之忽不
 禁其嗒焉西則龍蟠虎踞王居帝里楚州湘妃夔
 府巴子縱陽有陶侃之遺風濠梁為莊周之舊址
 矧鍾離之京邑猶攢松楸之寢園已圯北則萬艘
 千艇直達幽州歷於三倉經彼百郵慨長淮於門
 戶憶泗上之諸侯釣臺懷王孫之芳草袁浦嗟公
 路之寒洲南則裴叟金山孫權鐵甕繫周初之秦
 伯與吳先之虞仲達八閩之荒區念九服於禹貢
 時莫知乎錢鏐世久異乎南宋東則巨浸稽天島
 夸卉服銀榜蓬山扶桑若木漢家安期秦時徐福
 雖無外之可求亦荒略而難卜又何以弔箕子之
 朝鮮營義叔於暘谷或自其近者而觀之海濱廣
 斥鹽筴紛更水煩魚亂邱墟草生官梅已萎瓊花

不榮燕巢於林狐藉於城乍掩積血未銷戍兵使
舟笳鼓軍旅旆旌蝦蟹猶市雞犬或驚亦有雪蔀
名館明月吟橋雙檜千柳昔茂今凋隋宮宋殿風
酸霧驕玉釵金鈿翠輦鸞鏡殘牆廢苑仙觀僧寮
冷烟漠漠落日蕭蕭亦有槐柯之郡玉勾之天書
藏李氏池號青蓮八月濤水第五名泉臺存戲馬
廟立浮山雷塘月榭汴渠龍船餘風扇習古跡猶
傳花占金帶樓紀迎仙淮南無弩中散絕絃馬塲
武庫徒存簡編乃若媮惰晏衍浮奢虛肥估喜蒲
環人競鮮衣味兼陸水卉植芳菲農不勤畝婦不
織機雖有勞人思士炳幾知微城羶慮寇福過生
饑庖廚不遠歌舞爭希借慈氏之善導庶知悔而
移徽矧山川其如故嗟百草之具腓人不思乎用
舊境雖善而堪諷颺或慮於海島荻長滿於漁磯
慨大道之如砥思古人兮不歸然則登高望遠低
徊歎歎有妻斷而欲絕者豈不四眺而沾衣吾平
情而論之何已何人何是何非何今何古何依何
違嗚呼君之所嘉者恭也天之所助者順也惟恭
順之系於延陵兮膺帝眷而爵進輕七寶以為施
兮薄五等之崇峻是故寵兼文武功媿封濬遭滄

桑之更移感百年之一瞬猶心懷於魏闕作斯塔
以遙覲後有來者能不躊躇於叢霄之六虛等觀
於鳳凰
之千仞

弘恩寺在城西二十里

化城寺在瓜洲鎮江岸原名息浪菴康熙四十二年

勅改今額四十四年

御賜泉聲咽危石日色冷青松大幅又蒲團竹几通宵坐掃

地焚香白晝眠一聯

香阜寺在黃金壩南舊名五臺菴康熙三十八年

御書改寺額為香阜寺又

御書名香清梵四大字五言唐詩一幅懸寺內

江者果云 卷一 三
萬佛寺在仙女廟北康熙三十八年

御書賜雲門雪竇四大字

善覺寺在挹江門外官河南舊名華藏菴康熙三十八年僧碧水重修請

御書賜今額

南來觀音寺在通濟門內西南隅里人名其地爲觀音堂

準提禪院在新城懷遠坊

九蓮菴在南門外古渡橋東順治初僧道忞因舊址建卽古二分明月菴

水月菴在城南官河北岸菴有杉木儼然白衣大士像
玉皇閣一在瓜洲鎮東關外閣臨江北固諸山拱揖懷
抱稱勝境焉一在邵伯埭明天啟初年東魯道士劉化
芳募得木料聖像舟載以歸經邵埭風雨波濤大作舟
不能前爰營宋羅令祠故址建閣復建羅令祠於閣後
康熙二十七年建下院名孚佑菴在尖竹顛

紫極宮

考證通鑑記事云宮有唐明皇像楊行密每有封拜於像前陳制書再拜然後下

崇道宮

江都縣志 卷一
考證宋博士孫邁及贊善潘若冲建請於朝有詔
賜名曰崇道

三清院在廣儲門外劉家莊

東嶽行宮著名者凡三其一舊在大東門外天寧寺後
今有高阜名太山者卽其故址也明洪武元年居民周
滄海遷於縣治西北四望亭成化間揚州衛指揮李忠
修一在新城洗馬橋南一在縣北邵伯鎮湖濱洪武二
十九年鎮民劉忠建正統十年姚泰春重修

附錄

元成廷珪廣陵岳宮黃籙壇詩濛濛雲氣濕
霓旌小隊紅綃鳳蠟明鸞鶴舞隨行道影魚
龍出聽步虛聲淮南高士青毛節句曲仙人
碧玉笙一路天風吹不斷此身今夕在蓬瀛

碧霞行宮在東水關運河東岸祀泰山元君

武當行宮一在大東門外臣止馬橋一在北門外郡厲

壇西

斗姥宮在北門外紅橋東邑人羅光榮建康熙四十六
年

御書大智光三字額懸宮內

三元宮在小東門外新街東祀天地水三官

離明宮在新城丁家灣北

萬安宮在引市北

白鶴宮

考證陳後山詩話廣陵有戲馬臺其下有路號玉

鈞斜唐高宗東封有鶴一焉乃詔諸州為老氏築

宮名曰白鶴明趙靈均金石林載揚州碑目有唐

白鶴廟池碑

天妃宮舊在挹江門裏歛人程有容感神夢乃建廟於

南門外魏禧為之記

附錄 國朝魏禧揚州天妃宮碑記畧云揚州古無

舟落大洋眾饑渴欲死仰見空際有神女見知為
天妃也羣泣拜而跡之至絕島多奇花卉有鳥卵
五色布散崖谷間眾拾而吞之得不死客曰是必
有故相追尋一里許得像石崖中與所見神女畧
同眾相率拜謝遂奉以登舟像質沈香脰拇骨節
運動如生人像登風作舟達故處後過廣陵舟忽

重百人牽紼絳邪許助之膠不進乃以筵篲卜於
神曰神其樂此乎許之於是釀金造宮於邗水之

上按神閩之莆田人與化志載五代閩王時都巡

簡林公愿第六女歿而為神賜號天妃而藁城倪

中天妃廟記則云神生宋元祐八年一云太平興

國四年神生有靈異幼通悟秘法預知休咎比筭

不字能乘席渡海御雲以游島嶼眾呼為龍女雍

熙四年上昇或云景泰三年或云紹興乙丑八月

六日聞空中樂聲氤氳有絳雲若乘自天而下神

乘之上昇是後常衣朱衣飛翻海上里人祠之數

說者未知孰是然考宋世神凡十四益封明永樂
嘉靖間屢著神異晉封奉祠而夫人之游江海及
水旱疾疫每祈輒應則其為有功
德於民而可列諸祀典無疑也

文昌宮在南門內新橋明萬曆三十七年督鹽政御馬
監太監魯保建巡撫遼陽都御史李植為記崇徵間兵
備道鄭二陽重建

國朝康熙二十三年邑人王復衡許承宣承家鼎新之江蘇巡撫湯斌為記二碑具在宮內

文昌閣在南門外官河岸文峯巷側每賓興時府縣餞試士於此

附錄

明孫鑛維揚郡城南文昌閣碑淮海惟揚州城而南里修有三如矢的是趨厥氣弗含祝融為災文教罔培土習用隤狐疑相猜惟二十三年歲在端蒙協洽士議於巽巷語相荅乃鳴於邑於郡於臺謀無不諧鳩工度財版鋪子來匪防是曲惟水貴曲迂指吳維委蛇還轂乃經坤道抱於離腹千步有餘折入餉渠遠導嶺源百流皆輪激行無恙維堤之障比於砥柱郡城是向從眾之謀作閣其上十載乃成厥觀用壯飛薨翼翼方庭殖殖望之屹屹即之秩秩繪屏於楹有燦六星去鑄去彫不貌以形左右雙亭維閣之肱琅玕凌風兩叢青

青南為大池芙蕖播清橫亘小堤因舊河形最後築堰上構三亭夾以垣墻截以杉柵對植名花縱橫成列春瓊炫日秋丹迎月或浮錦浪或傲寒雪爛漫庭際吐芬揚烈東峙浮圖聳秀城隅西祠文昌正氣是扶如揖如承不謀而符其北隄灣日飛萬舷直郡之南當閣之前方石鱗次厥構以堅鯁旋之湍止水為漣非為遊觀其勝適然郭首障渠作閣者朱前後相成有造茲區其政拊摩其教恬愉化孚人和膏澤旁濡朱衣楚楚青衿惟旅頌德無窮傳經比宇勒茲石文置於水滸垂千億年仰止有所陸弼同友人登文昌閣詩鳥外翠恩海色寒蕭蕭風景此憑闌橋邊酒美差堪貫京口山佳偶共看匝岸千帆秋水濶隔林孤磬晚烟殘綵毫一賦枚生後搖落誰還問鶡冠

文昌樓一在府儒學前文津橋上雍正五年重建

都天行宮

考證儀徵新城神廟碑云元至大初州大疫有孚

江都縣志 卷一
惠先生者楚人也得其師徵牧公之學由潯陽東游於儀憐州疇之病以神符秘溟飲之疫皆不藥而愈州人德之因爲剏道宮於新城按此乃神廟所由昉也神後加勅封廟祀甚廣今江都城內外所在多有之

萃靈宮在董子祠側

蕃釐觀在府城大東門外卽古后土祠漢成帝元延二年建唐中和二年高駢更崇大之本漢書所謂后土富媪肖女像又因小說有韋郎事塑綠衣年少於旁至宋程頤以其褻始撤之政和間賜蕃釐觀額明宣德間郡

守韓弘增修吏部尙書魏驥有記萬曆二十年郡守吳秀創玉皇閣於三清殿後當后土祠遺趾舊有瓊花一株一名瓊花觀相傳世無此種宋歐陽修守郡建無雙亭

考證澠水燕談云揚州后土廟有瓊花一株潔白可愛歲久木大而花繁俗目爲瓊花不知實何木也齊東野語云揚州后土祠瓊花天下無二本絕類八仙色微黃而有香仁宗慶曆中嘗分植禁苑明年輒枯遂復載還敷榮如故淳熙中壽皇亦嘗移植南內逾年憔悴仍送還之杜游瓊花記謂紹

興辛丑金人揭本而去其小者翦而誅之趙炎以詩弔之曰名擅無雙氣色雄忍將一死報東風他年我若修花史合傳瓊妃烈女中明年根旁復生三蘂道士金大寧培護久之暢茂如故及元至元十三年忽枯道士金丙以聚八仙花代之據此則瓊花兩移於宋一揭於金再枯於元此花之始末也明初志及高宗本志皆謂瓊花一名玉蕊考韻語陽秋云瓊花惟揚州后土祠中有之其他皆聚八仙花近似而非鮮于侁詩云百蘂天下多瓊花天上希結根託靈祠地著不可移八葩冠羣芳一

株攢萬枝而春明退朝錄云瓊花一名玉蕊不知唐昌觀有玉蕊長安觀唐內苑招隱山亦皆有之玉蕊旣卽瓊花何以諸題玉蕊者絕口不及瓊花之名耶全唐詩話又謂揚州有唐昌觀是以蕃釐爲唐昌也唐昌觀在長安光業坊唐昌公主下降因而爲名花爲公主手植康駢劇談載神女來遊事時王建白居易張籍嚴休復諸人各有詩此唐昌玉蕊所由名與揚州蕃釐觀何預宋无感瓊花詩云應須有玉女到此賞瓊葩亦誤引唐昌事也又代醉編云傳記所載揚州瓊花天下祇一本及

觀西吳里語復云宋時德清嶽祠廡下有瓊花一本春時盛放每告朔設會特開數朶時號月旦花按瓊花之名至宋而盛韓琦歐陽修皆謂天下無二宋郊劉敞猶且傳譌何有於西吳里語耶此花不知植於何代唐人未有詩歌自宋至今吟咏甚多不能盡載擇其尤雅者著於篇

附錄

宋張問瓊花賦揚州后土祠瓊花經兵火後枯而復生今歲尤盛邦人喜之以為和平之證也乃賦之賦曰偉赤社之會都滋黑壤之饒沃萃溫潤之秀氣發英華於地軸於是瓊花異於凡木香凝媚服之蘭色瑩光明之玉托根后土之祠擢榦蜀岡之麓曾不知其歲年亦弗紀於圖錄欲問司花之女但注詩人之目謂天下之一株冠羣葩之芬馥豈唐昌之餘芳載後庭之遺曲者乎當

其風入琳宮春歸華屋萼拆青綃色凝寒綠枝珊瑚兮鏤雪冰蘂珠璣兮爛金粟徵庭靜兮朝曦麗其纖穠仙籟深兮瑞露滋其芬郁瑤林瑰艷之蔥蒨閨苑琪英之耀煜若蓋而繡似璧而縠如黃琮珞璣璀璨于禋壇而文珠佩環玲瓏乎衣鞠桂娥競爽借月影於冰蟾阿母來觀下雲駟於皓鵠儷靚容於茉莉抗素馨於薝蔔笑玫瑰於塵凡鄙荼蘼於淺俗惟水仙可並其幽閒而江梅似同其清淑徵絕代之無雙久彌芬於幽谷若乃聚八仙之殊種玉蝴蝶之別族葉扶疎而韻不勝色近似而香不足猶瑾瑜琬琰之粹溫豈砥礪堅珉之碌碌蓋艷冶爭妍者衆之所同而艷潔尙白者我之所獨是以兵火不能焚邊塵不能辱根常移而復還本已枯而再續疑神明之護持偏化工之茂育抑將薦瑞於太平而致祥於玉燭元郝經瓊花賦并序中統二年春三月制使李公致瓊花數枝是年冬十月而夢二客相邀至維揚之后土祠飲於花下嘯歌為樂既醉而覺乃作賦焉辭曰江風吹雲枕壓霜月神不棲目軼思超越栩栩曳曳境與世別天宇闢凡蹤絕歷蘭路開桂闕飄飄乎憑高

御空不知身之幾何而造乎虛白已而扶搖頡頏
恍惚莫量疑在鈞天亦如巫陽孤雀飛來縞衣元
裳翻然負予背風翱翔下視淮海雉堞相望貝錯
珠瑩接屋連墻繡簾瑤櫳綺疏綠房十里一市金
紗煌煌混灑海之魚龍駭飛埃而陸梁忽丹霄之
二仙翥青鳥以相將指仙花以為言可醺月而飛
觴是閬苑之仙根來瑞世而呈芳折膩雪以搖碧
刻春冰而帶黃噴葦蝶於花心引輕絲而不狂天
風收其落英不委地而飄揚彼眾卉則俗死漫紅
妖而綠倡玉陰婆娑徙倚徜徉清香忽來莫知其
方乃誦明月之曲歌窈窕之章倚歌橫簫鏘鳳鳴
凰挹芳瀾之浩渺傾墜露之淋浪卷瓊瑤於杯盤
吸霜露於肺腸欲折枝而不敢懼真宰之或傷且
對花而舉酒澆遯世之茫茫儵焉玉女隔花而語
髣髴花神是為花主謫自瑤華以臨后土翦冰綃
以為裳染麝塵於金縷拂白霓而下征曳秋霞而
輕舉現仙姿於塵寰寓風神於月府且曰有姝其
字飛瓊適來瑤池善為新聲與君佐酒以薦予誠
遽作穿雲振搖瓊英說仙家之幽杳詠蓬壺與赤
城闔花朝以逍遙駐芳姿以輕盈嗟胡為乎斯世

而沉冥於此生也時予既醉二仙亦去花落尊空
歌殘玉樹斗轉參橫脫兔驚寤餘香冉冉月滿窗
戶乃為記夢之歌曰玉宇春兮花始開與二仙兮
飄然而來花亦喜兮搖搖乎瓊瑰掇飛英兮汎酒
杯飛仙為我兮歌以纍纍亦既醉兮胡不歸花滿
袖兮香滿幃謂予是夢兮余不疑嗟時之人兮孰
非夢之為唐羅隱后土廟詩四海兵戈尚未寧
始於雲外學儀形九天元女猶無聖后土夫人豈
有靈一帶好雲侵鬢綠兩層危岫拂眉青韋郎年
少知何在端坐思量太白經宋王禹偁詩二首
誰移琪樹下仙鄉二月輕冰八月霜若使壽陽公
主在自當羞見落梅粧春冰薄薄壓枝柯分與
清香是月娥忽似暑天深澗底老松擎雪白娑婆
韓琦后土祠瓊花詩維揚一株花四海無同類
年年后土祠獨比瓊瑤貴中含霰冰芳外團蝴蝶
戲茶蘼不見香芍藥慚多媚扶疎翠蓋圓散亂珍
珠綴不從衆格繁自守幽姿粹嘗聞好事家欲移
京轂地既違孤潔情終誤栽培意洛陽紅牡丹適
時名轉異新榮託舊枝萬狀呈天麗天工借顏色
深淡隨人智三春愛賞時車馬喧如市草木稟賦

殊得天豈輕議我來首見花對月聊自醉 劉敞
 自淮南遷東平移后土廟瓊花植於濯纓亭詩淮
 海無雙玉蕊花異時來自八仙家魯人未覩天中
 樹乞與春風賞物華 王令詩無雙亭下枝密密
 復稀稀蚌碎珠駢出鬚牽蝶合圍會須珍作寶常
 恐散成飛况是東風後遊人莫易歸 秦觀瓊花
 詩無雙亭上傳觴處最惜人歸月上時相見異鄉
 心欲絕可憐花與月應知 呂本中謝人送瓊花
 詩二首疑烟欲滿讀書窗忽有瓊花樹小缸更喜
 風流好名字百金一朵號無雙 斷腸風味久難
 尋尚有名花寄此心折盡春枝春已晚只宜良月
 不宜陰 方岳約黃成之觀瓊花予不及從以詩
 代簡杜宇聲中鬢欲華春風將綠又天涯欠隨江
 夏無雙士共看揚州第一花想像煙雲人跨鶴淋
 漓詩句字栖鴉蹇驢不管唐衫濕醉兀歸鞍暮雨
 斜 陳允平詩塵擁粧臺翡翠翹瓊花開盡玉魂
 銷崑崙山上天風落二十四橋吹洞簫 何夢桂
 弔維揚瓊花詩雙鶴揚州問故家一樽后土弔瓊
 花人間驚破霓裳舞天上徵回玉女車死藥記曾
 霑雨露落英誓不污泥沙後庭玉樹今誰主猶得

臺城葬麗華 謝翽前瓊花引后土祠前車馬道
 天人種花無瑤草英雲蕊珠欲上天夜半黃門催
 進表酒香浮春露泥泥二十四橋色如洗陰風吹
 雪月墮地幾人不得揚州死孤貞抱一不再識夜
 歸闌風曉無跡蒼苔染根烟雨泣歲久游魂化為
 碧 後瓊花引揚州城門夜寒雪揚州城中哭明
 月墮枝濕雲故鬼語西來陰風無健鵲神娥愬空
 衆芳歇一夕蒼苔變華髮宮花宰簾塵掩襪玉華
 無因進吳越灘離淮水山中央誰其死者李與姜
 元宋无感瓊花詩后土祠南裔坤維媿室家國
 封嚴典禮宮祀盛褒嘉不是神靈異焉能眷邇遐
 應須有玉女到此賞瓊葩麗服從空降明粧倚日
 斜同揮五雲扇共駐七香車月姊羞調粉風姨罷
 散花青童迴絳節金母屏彤霞故事唐時盛佳名
 宋代誇塵根雖下界天意在中華雪讓瓏璫巧冰
 銷刻鏤瑕人間惟獨爾地上更何加萬籟殊寥落
 羣芳避豔邪玫瑰誠執御芍藥等泥沙聖運俄經
 輟兵疆忽肆拏舛訛難核實真贗遂聲牙雷雨還
 驚蟄潛藏重發芽旁枝微舊岫新葉謾榮莠尤品
 終蕪沒珍豨逐水涯兩朝成草莽九廟雜龍蛇古

殿蘭旗暗殘爐桂燎餘顏愁想像珠樹絕驕奢
寂寞無雙譽徘徊但自嗟八仙聊免俗消得寶欄
遮 趙文瓊花上天歌朔風吹沙堆浪白二十四
橋沉冷月顛風夜半撼蕪城雪萼瓊絲破空碧金
瓶歲歲獻君王玉罌泛酒連花香明光殿暗沙漠
遠人自無情花斷腸落盡飛天識天路何如拔樹
飛昇去唐昌游女再歸來城中只有瓊花露江南
俘客吟如叫想像裁辭不成調天宮夜半按霓裳
玉女擎花紫皇笑 謝應芳瓊花行送盛克明教
授歸維揚詩揚州好花非不多奈爾絕品無雙何
水沈香漬素玉蕊琉璃滑葉青瑤柯東風二月花
時節二十四橋香浸月山山叢桂避芳塵東閣官
梅褪殘雪向來名士多品題括香御史今亦知何
日移春獻天子不負此花天下奇 尹廷高揚州
后土祠瓊花詩無雙亭下萬人看欲覓殘英一片
難夜靜月明猿鶴唳誤翻玉雪墮闌干 明劉溥
瓊花觀送人詩瓊花觀在江都雲窗月館仙人居
無雙亭前一方地昔日瓊花今已無玉女香車游
碧落回首人間塵漠漠重闌空護八仙花飛珮誰
乘九臯鶴古城楊柳接東橋十里紅樓路不遙行

舟過此一停泊琪樹陰中聽紫簫 茅誦題瓊花
觀詩秦山楚水路迢迢不道瓊花亂後凋鶴背仙
遊清夢遠月明誰度紫鸞簫 程敏政瓊花詩貪
看江都第一春龍舟元不為東巡閒花亦自能傾
國何況當時解語人 何嘉言詩無雙亭子任欵
斜冷落祠前一片霞誤向西京尋玉蘂愁看南國
換瓊花朱闌祇剩蒼苔砌絳節誰停碧落車自是
人間留不住莫同風雨怨凡葩 宋劉克莊調昭
君怨詞后土宮中標韻天上人間一本道號玉真
妃字瓊姬 我與花會半面流落天涯重見莫把
玉簫吹怕驚飛 馬莊父調賀新郎詞客裏傷春
淺問今年梅蕊因甚化工不管陌上芳塵行處滿
可計天涯近遠見說道迷樓左畔一似江南先得
煖向何郎庭下都尋徧辜負了看花眼 古來好
物難為伴只瓊花一種傳來仙苑獨許揚州作珍
產便勝了千千萬萬又却待東風吹綻自昔聞名
今見面數歸期屈指家山晚歸去說也稀罕 周
密調瑤花詞朱鈿寶玦天上飛瓊比人間春別江
北江南曾未見謾擬梨雲梅雪淮山春晚問誰識
芳心高潔消幾番花落花開老了玉關豪傑 金

壺剪送瓊枝看一騎紅塵香度瑤闕韶華正好應
 自喜初識長安蜂蝶杜郎老矣想舊事花須能說
 記少年一夢揚州二十四橋明月元張翥調喜
 遷鶯詞東風吹盡但一片綠陰空留春恨后土祠
 荒飛瓊謫久還喜玉容堪認二十四橋夜月二十
 四番花信便載酒怕芳心易老陰晴難穩嬌困
 羞起竚立畫闌淨洗閒脂粉沉水濃薰蜂黃淡染
 自有絕塵香韵也知世間無對肯許浮花相近鳳
 簫遠待數枝折
 與玉峰人問

浮山觀在縣西卽禹王廟成化高宗本志作浮山道院

附錄 國朝宗元鼎詩石塔香燈古寺隈居民誰問
 禹宮頽惟餘一片浮山石曾見平成天地來

三清觀

附錄 宋張蘊詩土霧如蒸暴暑天燭龍偏駐柳
 邊船三清觀裏風廊午滿意題詩借榻眠

元妙觀萬曆陸志云在城東北僅存遺址

元帝觀一在小東門內宋皇慶間建一在瓜洲鎮咸淳

五年道士龔秋岩建

明正觀在府東南隅壽安寺東元道士周源宏建明成

化二年道士李永靖同郡人尹慶募修

祐聖觀一在大東門外運司東圈門明洪武八年道士

李一清建宣德七年道士朱正慶重建一在邵伯鎮元

至正間道士王澹淵重建洪武十三年道士符春浩修

高宗本維揚志俱作祐聖道院

天寶觀在郡南門外運河東明萬曆十六年建

論曰國之饗祀掌於秩宗其在天下之郡縣者苟

江都縣志卷之十一
非淫忒亦得唯其所欽承焉此江都祠廟之有若
而所也今

天子天明地察懷柔百神增先農之壇崇武安之享忠
義孝節咸秩域中蓋尤於典祀備矣凡在有位敢
不祇事孔明爰詳慎以考訂之俾吏民妥佑觀瞻
弗忘誠敬且無使嗤前賢以疑後代云爾至於二
教之流傳梵宇丹臺繁然烟雨亦第次其建置之
後先附載焉存而不論夫豈藉以壯觀邦域乎哉

江都縣志卷之十一終



